

中國全

名勝古蹟大觀
續編



上海

大陸圖書公司印行

上海图书馆藏书



A541 212 0018 9756B



中華名勝古蹟續編目錄

第十九編 貴州


一 黔中

白龍洞 瀉玉洞 朝陽洞 棲霞山 藏甲巖 養龍坑 石田 石船 石譜
 聖泉 集秀樓 易貴校易處 陽明祠 西望山 石天洞 鯉魚石 留雲洞
 陽寶山 香蓮巖 鳳凰石 白衣洞 觀音洞 憑虛洞 魯郎山 螺擁山 仙
 影厓 新開洞 葛鏡橋 龍洞 馬頭山 他山 生塘山 慈雲洞 家訓碑
 二冉故里 馬桑木橋 龍山 七星山 都勻洞 石壁墨刻 張三丰觀瀾處
 雲谿洞 孫應鰲墓 石邦憲墓 梅花洞

二 鎮遠

鐵山 彈子岩 漏日岩 觀音岩洞 甕蓬洞 華嚴洞 鐘鼓洞 斗厓山 鼓

中華名勝古蹟 第十九編 目錄



臺山 飛雲岩 潭溪 皮林山 雞鳴關 南明樓 飛鳳山 萬勝山 龍洞
鮎魚峽 石芝洞 仙人洞 李盤墓 李渭墓 巨人跡 觀音厓 西岩寺 雲
岩石柱 燕子厓 石阡龍洞 臥龍山 魚子孔 騰雲洞

三 貴西

..... 一五—三四

塔山 飛來石佛 水雲洞 永濟泉 雲龍洞 天柱洞 三岔河 關索嶺 九
十九隴 雙明洞 龍鳳山 金銀山 南仙洞 百刻泉 聚仙洞 留節洞 朝
陽洞 碧雲洞 桃源洞 天生橋 印山 墨續山 天佛洞

中華名勝古蹟續編

第十九編 貴州

一 黔中

白龍洞

白龍洞在貴陽城西北十五里。深數十丈。遊者秉炬導之。半里許。有水泠泠然。以橋渡之。更進則有石笋數莖。大如楹柱。扣之鏗然如鐘。又城西北三里有雲厓洞。一名唐山洞。亦曰芝巖洞。亦幽邃可遊。

瀉玉洞

瀉玉洞在貴陽城北四十里巖窩。中有石乳石牀。井竈俱備。洞口有泉外瀉。懸爲瀑布。林木幽秀。境地清勝。又城北有水落洞。爲衆水所歸。上有石樓可棲。

朝陽洞

朝陽洞在貴陽城南二里。洞中懸岩滴乳。景物至佳。而爽塏廊大。足供遊賞。下更有龍泉焉。

棲霞山

棲霞山在貴陽城東五里。一名東山。翠巘崔嵬。峭壁聳峙。巖石赭黝。形勢峻危。登臨眺望。可攬黔陽之勝。又城內舊布政司署。後有翠屏山。山不甚高。而青翠如屏。春夏之交。亦足遊觀。

藏甲巖

藏甲巖在貴陽城南隅。俗名鬼王洞。三國時。蜀漢王志英武過人。而貌寢。軍中呼爲鬼頭。從諸葛亮南征。擒雍闓過此。藏盔甲以鎮百蠻。

養龍坑

養龍坑在貴陽縣北。養龍司旁。名山勝概記。兩山之間。泓渟淵深。靈物藏其

下春初土人立柳坑畔。擊牝馬已而雲霧晦冥。類有物蜿蜒如馬接。其產必龍駒。洪武四年夏明昇降。獻良馬十。其一白者得之於此。賜名飛越峯。繪圖藏之。學士宋濂爲讚。

石田

石田在貴陽城南二十五里。相傳昔有隱士居此。忽有道士從假牛。云耕石田。隱士妻往索牛。道士怒舍之去。今石上耕犁之痕。乃其遺跡也。

石船

石船在貴陽城東二里牛渡河邊。長數丈。儼然一舟。不假人力。又舊貢院內有魁星石。聳然屹立。城西一里有犀牛石。昂首田中。宛如犀牛。

石譜

石譜在貴陽城南白納司。奇石突起。欹整橫斜。千態萬狀。足供繪圖。又城北四十里牛矢屯有仙蹟石。石上有人足跡。踵趾宛然。俗稱謂仙蹟。

聖泉

聖泉在貴陽城西八里。一名百盈泉。一名漏洩泉。自山麓湧出。晝夜百盈百竭。似有橐籥。莫測其端。下流溉田數百畝。明鎮遠侯顧成嘗鑿石爲池。立石池中。以驗消長。

集秀樓

集秀樓在貴陽城南隅。古木蔽陰。泉流潏繞。處地幽僻。風光清秀。蠻地軟塵中之勝區也。

易貴校易處

貴陽城北一里許。點易岩。爲明易貴校易處。岩以貴石。貴字天爵。明宣慰司人景泰中進士性剛正。歷官辰州府知府。有古循吏風。致仕歸。閉戶校書十餘年卒。嘗構樓城中以貯書。曰萬卷樓。

陽明祠

陽明祠在貴陽城東。祀明新建伯王守仁。祠背山而立。岩洞幽深。花木秀發。蘿藤糾蔓。臺榭崇峙。爲景至爲清勝。相傳陽明曾讀書於此。後人慕陽明之爲人。因爲建祠。祠中多人楹聯。有僧住持。春秋佳日。遊人集焉。

西望山

西望山在息烽縣西。盤互百餘里。與紫江縣南望山對峙。山巔有鳳凰嶺。濶可里許。前有三峯曰翠屏。目遊莫若。皆壁立萬仞。蒼松虬結。而目遊更奇峭。有石筍數株。亭亭直上。又有盤陀石。踞絕險處。上平下削。高二丈餘。去石數百武。曰模羅峯。尤險峻。登必捫蘿而上。左有小澗。水落懸厓間。輒成飛練。澗之左。有雙石如柱。拔地而起。高數十丈。曰石門。

石天洞

石天洞在修文縣南五里。石峯聳峙。峭壁削成。中通一竅。高敞可以遠眺。昔有王輔搜奇至此。建庵三楹。謂之木皮庵。

鯉魚石

鯉魚石在龍里縣西五里道旁。躍鱗昂首。揚鬚鼓鬣。有煙雨欲飛之勢。

留雲洞

留雲洞在龍里縣南一里許。洞中懸二石乳。扣之如鐘鼓。左有一石臺。曰雕雲臺。奇石有天然之巧。

陽寶山

陽寶山在貴定縣北十里。高可百丈。樹木森羅。諸山環向。稱黔東之勝。舊有前後兩寺。殿閣崔嵬。香火頗盛。明萬曆時僧白雲嘗居於山。白雲大理人。戒行精嚴。好山水。喜探幽勝。嘗窮蕪澤。山故多虎。人止之。勿聽。裹糧入山。恆數日不返。竟無遇虎。而虎亦絕。

香蓮巖

香蓮巖在貴定縣西南舊城南。石如白玉。嵌空玲瓏。上生香草。巖下有石如

龍。角爪鱗甲皆具。稱曰石龍。

鳳凰石

鳳凰石在貴定縣西二十里。文彩羽翼。宛肖鳳形。邑人以爲人文之徵。

白衣洞

白衣洞在貴定縣西四十里。洞門高數十丈。一徑崎嶇。穿厓而入。凡三折。變幻莫可名狀。幽景萬千。土人嘗建庵其中。

觀音洞

觀音洞距貴定縣三十里。洞中奇石森立。如衆獸形。又有石佛甚衆。周旋其中。如處寺殿。洞外羣山環峙。古木扶疏。蘭若居其間。禪房清潔。殿宇崇闕。遠耳鳴泉。近聞梵唄。俗塵盡祛矣。

憑虛洞

憑虛洞在貴定縣西十五里。舊名母猪洞。明邱禾實易今名。洞中周如華蓋。

石乳滴成巖竇。奇勝難名。前有小洞。水聲遠震。吼若轟雷。名曰雷鳴。又西南一里許。有龍山洞。高可百餘尺。有丹爐。石几。及巨人足跡。諸勝。

魯郎山

魯郎山在紫江縣東六十里。一名乖西山。元逸士有魯姓者讀書其上。因又名書案山。旁有洗馬池。相傳爲漢諸葛武侯遺跡。

螺擁山

螺擁山在廣順縣東二十里。山高五里。其形如螺。上有深淵。水碧如藍。四時不涸。每天欲曙。百鳥集而飲之。山旁有螺擁寺。卽羅永庵。世傳明建文帝遜國後。至此題詩于壁。

仙影厓

仙影厓在平越城南二里武勝關。石壁如屏。上有張三丰遺影。儼然畫圖。明郭之章鐫神留宇宙四字於其旁。

新聞洞

新聞洞在平越城西門外山下。清康熙元年三月雷雨。山石忽開。陷然一洞。內中玲瓏奇奧。深不可竟。

葛鏡橋

葛鏡橋在平越城東五里。跨麻哈江上。明萬曆中。郡人葛鏡建。屢爲水決。三年乃成。高數十丈。行者如履雲霄。爲黔南橋梁之冠。清時重修。並嘗砌腰牆百餘丈以爲衛。往來便之。

龍洞

龍洞在甕安縣北三里鼠場。洞極幽邃。水深數仞。上跨石梁。寬平可涉。中有神魚。景物幽奇。

馬頭山

馬頭山在湄潭縣南十五里。山下清泉幽谷。古木陰森。稱林壑之勝。又縣西

十五里有瑪瑙山。三面石壁聳翠。五色燦然。日初出時。光彩尤麗。

他山

他山在餘慶縣西南。蒲村之上。柳湖之陰。山高不半里。迂曲斜抱。奇石礧礧。近邑之人。時遊於此。不以山小無名而棄之。

生塘山

生塘山在餘慶縣東北二十里。高聳屹立。峯有塘曰犀牛塘。廣可數畝。四時不涸。上多古木。陰森無暑。夏季納涼。最爲相宜。

慈雲洞

慈雲洞在餘慶縣東二十里。洞前石筍高數十丈。一水遶其前。左右怪石林立。內有石大士像。

家訓碑

家訓碑在遵義城北白錦堡。宋楊瓌以十訓刻於石。示子孫曰。如能順從。則

世享福壽。按宋乾符初，南詔陷播州（遵義在宋時爲播州樂源郡）太原人楊端應募領兵克復之。遂授安撫使。諭以威德。縻以恩信。蠻人懷服。子孫世襲其職。璨卽其十三世孫也。嘉泰初，乃襲職。開禧間，蜀帥吳曦亂。璨輸金錢戰馬，以助國用。卒贈大將軍忠州防禦使。追封威毅侯。子价亦以邊功授閣門宣贊舍人。

二冉故里

二冉故里在遵義城東。地名冉家邦。其墓在綏陽縣郎小里。二冉冉璉冉璞也。宋播州人。俱有文武才。前後辟召皆不赴。及余玠安撫四川。璉兄弟聞其賢。往謁之。玠與分庭抗禮。待之甚至。久而無言。使人窺之。惟相對據地。以聖畫地爲山川城池狀。旬日見玠。曰。蜀口形勝之地。莫若釣魚山。請徙合州城於此。苟得人守之。賢於十萬師遠矣。玠大喜。奏聞。卽以璉爲承事郎。權發遣合州。璞爲承務郎。通判州事。徙城事悉以任之。後果賴焉。

馬桑木橋

馬桑木橋在綏陽縣城西螺水中。一大木橫水面。圍四尺五寸。不知其自來。水漂亦不動。相傳昔有欲伐之者。方施斧。雷電忽作。故木有斧跡焉。

龍山

龍山在都勻城西五里。本名蟒山。明刑部主事柳州張翀易以今名。建龍山道院於上。有記云。郡城隔河有龍山。雄峙崔嵬。雙峯插天。躋其巔。逶迤若數千里。卜築之曰。有靈龜大尺餘。蹲伏其前者三日。於是建樓閣。闢殿宇。自麓至頂。爲磴道數千尺。殿後石坡高廣平坦。其文青赤二色相間。有泉。左右皆古木。今殿宇已淪荒蕪。而山嵐樹翠。固猶足令人遊賞不已也。山之前面爲觀音坐山。峯巒相望。

七星山

七星山在都勻城北七里。峯巒拱立如七星。山有洞。清迥幽妙。梯石而下時。

如聞風雨聲。初甚紆暗。行數武始平曠。中有深潭。風疾濤沸。寒氣逼人。

都勻洞

都勻洞在都勻城南都勻司東十里。洞門北向。高廣皆一丈五尺。洞中石如象雜。鼻草叢生。風物怪奇。

石壁墨刻

石壁墨刻在都勻城北。遷客張翀題鐫曰。仁智之情。動靜之理。棲此盤谷。飲此泉水。

張三丰觀瀾處

都勻城北三里夢遇山下。臨劍河。衆水匯流。波光浩淼。乃張三丰觀瀾處。有碑曰。仙人張三丰觀瀾之處。

雲谿洞

雲谿洞在鑪山縣北十五里。一名太空洞。高可十丈。可坐千人。行數十步。巖

徑險仄。又一洞曰中洞。頗爲幽暗。尋厓而登。又一洞曰上洞。最擅奇勝。溪水從旁流出。資以溉田。

孫應鰲墓

孫應鰲墓在鑪山縣西一里。應鰲字山甫。明清平衛人。嘉靖中進士。改庶吉士。授戶科給事中。補江西僉事。禦流寇有方。累遷僉都御史。巡撫鄖陽。奏免光化諸縣秋糧。陳勤學勵政。親賢遠奸諸事。兼劾太和宮大璫呂祥貪暴狀。上皆納之。尋病歸。萬曆初。召起原任。請錄建文死事諸臣。并復革除年號。奏雖留中。識者韙之。歷禮部侍郎。掌國子監事。請停納粟入太學令。進南工部尙書。後卒。諡文恭。

石邦憲墓

石邦憲墓在鑪山縣北三里。邦憲字希尹。明清平衛人。嘉靖中。署都指揮僉事。充銅仁參將。累破苗寇。進署都督僉事。充貴州總兵官。平定諸叛苗。官至

右都督。邦憲熟苗情。善用兵。大小數十百戰。無不摧破。所得俸賜。悉以饗士。家無餘資。爲總兵官十七年。威震夷中。與四川何卿。廣西沈希儀。並稱一時名將。卒贈左都督。

梅花洞

梅花洞在獨山縣南。巖水噴瀉。白石鑿鑿。狀如梅花。景頗佳勝。明宣德九年。有叛苗據此。都指揮願永討平之。

二 鎮遠

鐵山

鐵山在鎮遠城東北。偏橋廢衛東北。高峻突兀。石色如鐵。下有鐵溪。屈曲澹迂。受鐵山諸巖壑水。中產魚蟹。爲味頗佳。溪之第一灣。有巨石下瞰如屋。名曰石屋。其第二灣有長潭。潭之北岸。爲鐵山絕頂。南岸巖石委積成洞。有蹊隧通鎮陽江。江邊羣石錯立。急湍奔瀉。名浮石灘。其東有石側立。上多樹木。

名古牛厓。

彈子巖

彈子巖在鎮遠城西十五里。兩山對峙。相去數百武。左山頂有一石。圓如彈丸。右山中有一竅。明透如牖。

漏日巖

漏日巖在鎮遠城西舊偏橋司東半里。高數十丈。有竅中空。隨日早暮。東西漏景。又偏橋司西五里有張果老厓。幽妙可遊。

觀音巖洞

觀音巖洞在鎮遠城東十里。山高數十丈。屹立江上。其址劈分爲洞。廣一丈。袤三丈。高如之。內涵清漪。可比船而進。洞半有竅如窗。上有石如佛像。洞頂色碧有紋。隱隱如龍蛇。景物極佳。

甕蓬洞

甕蓬洞在鎮遠城西舊偏橋司東十五里。一名諸葛洞。鎮陽江水所經。行亂石窩中。盤渦傾仄。挽舟而上。相傳諸葛亮漕長沙以西粟至牂牁。嘗議鑿之。以隘塞而止。黔記。江水經此洞而出。有阨口五處。第一洞長七十丈。水口高四丈。第二洞長十五丈。水口高一丈五尺。第三洞長六尺。水口高一丈。鷺鷥灘長三十丈。水口高一丈三尺。芙蓉洞長十丈。水口高六尺。甕蓬者。言舟楫過此。如入甕中。如居蓬底也。水自芙蓉洞西至甕蓬。長不滿百丈。高約九十丈。加以兩厓多積石。所以旋鑿旋塞。終不能成坦流也。

華巖洞

華巖洞在鎮遠城西北三十里。洞臨官道。繚繞百折。中間石乳結成大土像。色相莊嚴。旁有石羅漢二。內頗黑暗。秉炬而入。路漸狹。更入丈餘。則復空曠。至此爲水所限。不能窮極矣。

鐘鼓洞

鐘鼓洞在天柱縣西三里。中可容數百人。有石懸若鐘鼓。擊之有聲。清流涓涓。出自其中。冬溫夏涼。亦佳境也。

斗厓山

斗厓山在黃平縣西五里。山有洞。高五丈。濶減其半。厓中無路。左右有虛厓。長二丈。常有泉下滲。每旱時厓輒有狂風。洞後山頂有穴。人入其中。洞口兩邊厓上。隱隱有字。不堪辨讀。正不知何人遺蹟也。

鼓臺山

鼓臺山在黃平縣南五里。絕頂孤峯。高懸天半。有一徑至山巔。屈曲陡峻。以石梯挽鐵索而上。登臨其上。則川如衣帶。山似培塿。城堞村廬。悉收眼底。

飛雲巖

飛雲巖在黃平縣東三十里。一名東坡山。又名月潭。泉洞靈奇。森林妍鬱。禪關爽塏。境景清幽。實爲闔邑之冠。明王守仁。吳維嶽。輩皆遊於此。作有記文。

王云興隆（衛名即黃平）飛雲巖壁立千仞。簷垂數百尺。其上頤洞玲瓏。浮者若雲霞。互者若虹霓。豁若樓殿門闕。懸若鐘鼓編磬。不可具狀。其下澄潭邃谷。不測之洞。環密回伏。吳云興隆東行三十里。有月潭寺。寺左爲巖。距地百餘尺。中虛而下嵌。乳液融結。豎者柱。蠹懸者絡。緜揚者鳥厲。突者獸蹲。邃洞豁豁而宵際。清渠激注而前繞。讀此則是岩之勝。雖今古不無變異。然可不遊而知矣。

潭溪

潭溪在黎平城西南。潭溪司南。下流合容江。大岩江。九曲河。而並注於福祿江。溪水澄清。可鑑人形。巨石橫跨其上。廣二丈餘。長十倍之。名天生橋。下影如虹。乃潭溪天成之佳景也。

皮林山

皮林山在永從縣。有二。一在縣南三十里。曰上皮林山。有皮林洞。高敞寬廣。

可容數百人。距山二里。曰下皮林山。一名過化山。石壁上題有過化二字。苗人歲以石灰填之。否則病目云。

雞鳴關

雞鳴關在青溪縣東十五里。觀音厓西。上倚懸厓。下臨瀦水。路僅一線。爲天設之險。關前有戟劍山、旗鼓山。形類其名。聳峙擁立。

南明樓

南明樓在玉屏縣城內。卽譙樓。明初建。基址方向。俱張三丰所定。明末南寧侯張先璧駐兵城內。盡搜寺鐘。填河中。造浮梁。至此而鐘忽自鳴。取者懼不敢動。乃棄云。

飛鳳山

飛鳳山在玉屏縣西二里。中峯聳翠如鳳首。其旁兩翼。夾峙如鳳。其上有衆香寺。舊時邑人多讀書其中。

萬勝山

萬勝山在思南城東一里。清時思南知府趙恆鑄仁壽二字於山腰石壁。因又名仁壽山。高數十丈。下臨德江。形勢陡絕。元末紅巾之亂。郡人避兵於此。頂上平坦可耕。明嘉靖中。李渭築室讀書其中。

龍洞

龍洞在萬勝山麓。有泉流溉田。土人往往禱雨於此。其頂又有真源洞。清澈一泓。旱而不涸。李渭鑄真泉二字。講易其上。撰龍洞易問。

鮎魚峽

鮎魚峽在思南城西西南十里。厓兩間古木陰森。碧波澄靜。最爲幽勝。厓壁下有一孔。若鮎魚口。因以名峽。長十餘里。烏江經此。湍流澎湃。險不可言。

石芝洞

石芝洞在思南城西四里。洞口北向。可布數席。明副使徐九皋刻石芝洞天

四字。又城西鐘鼓洞。有石乳懸空。擊之作鐘鼓聲。

仙人洞

仙人洞在思南城南三十里。昔有郡守劉謙吉平其珂。層級而上。建亭其間。周圍設檻。爲當時郡中勝覽。

李盤墓

李盤墓在思南城北人同村。盤明思南人。宣德中襲蠻夷副長官。鎮筭苗叛。盤帥兵討之。孤軍深入。遇賊策馬奮擊。斬獲甚多。後賊四集。援兵不至。遂被害。從弟邦政以石置樹間。記之。久而樹合生夾石。夷人夜過樹下。聞空中點兵音。以爲神。立祠樹前。號爲留石坡。

李渭墓

李渭墓在思南城東南萬勝山麓。渭字湜之。明安化人。嘉靖中。由鄉舉知華陽縣。隆慶時。歷官雲南參政。所至謹於其職。咸有惠愛。初問學於蔣信。及官

南都事耿定向。復與羅汝芳相得。所學以萬物一體爲主。而歸之自然。嘗會講於中和山觀音閣。郡人以其倡明正學。萬曆中嘗建祠於城西以祀之。

巨人跡

巨人跡在沿河縣龔灘江邊。盤石上有足跡。殊形長大。趾甲膚文。宛然俱備。又婺川縣東五十里燒岩上。亦有巨人跡。

觀音厓

觀音厓在印江縣七里。亦曰河縫。山壁高數十丈。上有石龕。下又有洞。深不可測。去厓里許。有石形垂如肺。呼爲金石肺肝。

西岩寺

西岩寺在印江縣西五里。宋建。明清重修。宏敞高曠。巨石壁立。林木葱蘢。有敲梆岩。以石擊之。而其聲之鳴。一如梆然。

雲岩石柱

婺川縣西一里有雲岩洞。中寬可容百人。外有石柱。柱上有紋如霞狀。稍前復有大石一枚。方如玉几。

燕子厓

燕子厓在石阡城南。一名太虛洞。景最幽深。中有萬佛岩。石大士像。及石龍石田。石虎諸勝。

石阡龍洞

石阡龍洞在石阡城西南三里。洞在龍底江上。其山高峻。下有洞。濶三丈許。深約三里。內有天生橋。約丈許。橋內有石田。過橋兩石如盤。形似葵。上有水滴盤中。其深莫測。洞內水聲潺潺。相傳神龍所潛。洞產奇石。大小類鴨卵。上有花文。深碧色。俗名醮果。可翫不可取。

臥龍山

臥龍山在鳳泉縣東五十里。上有臥石如龍。長三丈許。腹下出水。爲菖蒲溪。

之源。相近有石牛山。高數仞。上有巨石如臥牛。

魚子孔

魚子孔在鳳泉縣西北鳳凰山下。口圓如盤。日出則光漾其中。深不可測。水泛輒有青紅間黃之色。前有石磯。魚游其下。揚鱗鼓鬣。常迴旋于泉窟之間。

騰雲洞

騰雲洞在鳳泉縣南三十里。平地突起一峯。四面險阻。中通一孔。僅可容人。入數十步。洞中高濶。各五七尺。左右有罅。通明者五。一名太極洞。頂有文類太極圖。故云。

三 貴西

塔山

塔山在安順城南。元泰定二年建塔其上。常有白光自塔頂出。山多樹木。四時青葱。遊觀其上。境地清幽。

飛來石佛

飛來石佛在安順城東二十里。石形儼然如佛。共計九尊。其一在城東十里。相傳十佛飛來。其一追隨不及。故獨後云。

水雲洞

水雲洞在安順城南十里。洞內景物幽奇。爲邑中岩洞之冠。名山記。洞高十餘丈。中平曠可容千餘人。旁有潭水下注。西有一大竅。日光穿射。備紅黃白黑諸色。西南隅一石直立若觀音。東北有石蓮花。形色種種。西北特出一石柱。龍鱗櫛比。人稱爲石龍。蓋石髓淋漓。積久所致。

永濟泉

永濟泉在安順城西北二里。泉水涌出成溪。泓深清冽。周環城中。有砥二十。曰永濟砥。兵備王憲。起東西水關。以次而南。每砥命之以字。曰「雲雨龍行處。文章風動時。混涵九重潤。靈秀萬年期。」

雲龍洞

雲龍洞在清鎮縣西南十里。舊名涼織洞。又名華蓋洞。洞口扁窄。內漸寬廣。中則坦衍。可容數十人。其上往往有氤氳之氣。望之如雲。變幻萬狀。其相對者曰扁洞。

天柱洞

天柱洞在清鎮縣廢鎮西衛北三十里。懸厓百仞。一徑盤徑。洞極宏敞。中有一大石柱。孤撐洞頂。後有河水。聲吼如雷。土人嘗避兵於此。

三岔河

三岔河在清鎮縣西北。河之左右。萬仞壁立。一水怒流。岩石峻聳。月夜無光。昔人所詠「谷暗天如線。厓高月不暗」。洵非虛語。

關索嶺

關索嶺在鎮寧縣西三十里。勢極高峻。周迴百餘里。左右厓箐萬仞。中僅一

道如梁。險危莫如倫。比洪武初嘗建關索廟於上。清初建御書樓於頂。聖祖書黔南鎮鑰四大字。

九十九隴

九十九隴在鎮寧縣北百餘里。隴外開重關七八所。諸隴大小不一。彎環如帶。分門別戶。道通一綫。中平衍可耕。四面奇峯插漢。最高者曰高峯山。俗傳羅鬼弄兵于此。至今營壘遺址尤有存者。

雙明洞

雙明洞在鎮甯縣西五里。又名紫雲洞。俗名觀音洞。軒敞高朗。東西相通如城闕。中有流水。有橋可渡。明時車馬大道經其中。後因苗賊伏劫。乃改路於洞後里許。非探奇者莫至焉。明徐樾嘗遊於此。記云。兩山夾道。下有寒泉。注爲澄潭。白石壁立。潭流穿石。折而西廻。磷磷有聲。厓間石筍數尺。狀類佛座。其旁如侍童環立者數人。

龍鳳山

龍鳳山在平壩縣南五里。廻峯四合。秀水雙灣。白雲丹嶠。崢嶸日表。昔自然和尚遊此。以一袈裟地爲禪定之所。後遂爲遊士憩息處。

金銀山

金洋山在平壩縣東五里。一名藏甲厓。崇山峻嶺。石壁嶙峋。一戶雙扇。限闕儼然。相傳昔人藏甲於此。下有基壘。

南仙洞

南仙洞在平壩縣東南十五里。一名南蛇洞。石壁高數十丈。入洞二十餘武。地勢寬平。折而西。深潭隱隱。若神色逼人。不可正視。歷磴而上。石牕開明。垂照如室。幽景最佳。

百刻泉

百刻泉在平壩縣西五里。一名靈泉。亦名聖泉。自西郭沿流。躡石磴可五里。

許。疊幃中一泓。自石罅迸出。匯爲方池。每日潮汐無停。置石鼓其內。潮溢尺餘。下至鼓半而至。晝夜凡百次。因名。

聚仙洞

聚仙洞在關嶺縣南五里。洞門逼窄。僂僕以入。右渡一小橋。乃漸高敞。頂有一竅。光明下注。中有石床。石鐘之屬。

留節洞

留節洞在關嶺縣西北十餘里。石乳凝結。狀若盤龍。上有字如蝌蚪。中有石塔。左右又有曲房。天然不假椎鑿。昔有節婦避難其中。遇賊不屈死。因名。

朝陽洞

朝陽洞在安南縣西南一里。岩巒高聳。林箐密茂。日出則光先照。中產異石。有泉出石隙中。澄澈如練。

碧雲洞

碧雲洞在盤縣城外。一名水洞。又名玉陽洞。內有怪石。成人佛器具。悉皆畢肖。幽勝無窮。田雯黔書云。一盤州出郭里許。沿緣曲徑。直造巖陰。有洞憑焉。豁舒忽裂。齒頰皆露。不知鴻濛何年鑿也。一屏當門。灑青抹綠。游者摩娑拂拭。疑爲古玉。幽流旁洩。瀾瀾作擊筑聲。上有片石。叩之清越。以長始入。暗甚。必假炬以行。沙石錯然。夏人蹠趾。坐息少定。則劃然開朗。天牕漏日。下射層深。毛髮可數。黃虬下垂如斗。瞿曇大士番僧之象各一。或倚岩舞。或居石跏趺。或蟠厓仰觀。鬚貌如生。絕塵千尺。有龍升之。長與之竟。稍進。則駭浪轟雷。奪人氣魄。望之欲止。左方一徑甚微。側仄窅歛。足不可置。前牽後挽。蟻附螺旋。而後達。丹竈藥爐。無一不具。巍然一壘。拔地黏天。漸進漸溼。亦漸挾。不敢往。乃緣岩而上。可出洞頂。俯視萬山川原歷歷。

桃源洞

桃源洞在大定城西南三里。高濶數十丈。洞口舊值桃樹百餘株。故名。洞旁

有書卷岩。落水洞。衆水悉注其中。泉聲鏗然。

龜石

石龜在大定城南十里。石磴崎嶇。怪木叢生。一檜樹大可數十圍。上聳雲霄。傍一樹離奇天矯。根夾巨石。形態如龜。土人每於此禱雨。

天生橋

天生橋在威寧縣東北百里。石梁攢截。拱架如橋。懸互高十餘丈。長里許。僅容一人。往來相值。則不得前行者。每舉烽以示。一橋在城東八十里。

印山


印山在黔西縣東。林麓洞壑。負氣爭高。含露飲景。幽窗差互。中有磨刀溪。大石橫互。水流其旁。巉壁屹立。瀑挂爲簾。三疊而注於溪。明僧月溪至此。見景物幽奇。乃結庵其上。後人廣其居爲寺。曰永洪寺。

墨續山

墨續山在織金縣北十里。一峯特起。綠水環之。登者攀蘿捫壁。始陟其巔。上有修篁古木。怪石珍禽。迥非凡境。遊履到此。令人興出塵之想。

石佛洞

石佛洞在織金縣東三里。高濶數丈。中有白石似佛。又有石鼓石鐘之屬。又縣東有大穿洞。高百餘丈。路從中出。盛夏入之。涼氣襲人。又有小穿洞。中間一水清泓。曲徑崎嶇。內有石臺。容十餘人。



中華名勝古蹟續編目錄

第二十編 奉天

一 遼瀋

實勝寺 法輪寺 長甯寺 賢王祠 鐘鼓樓 古塔山城 清克勤郡王岳託墓
何和哩墓 清武勳王揚古利墓 費英東墓 額亦都墓 達海墓 黃龍岡
石塔 石門山 千朵蓮花山 東京城 金宮殿 廣祐寺 清穎親王薩哈璘墓
清誠毅貝勒穆爾哈齊墓 蓮花山 花兒山 黃花老人修仙處 煉丹臺 尉
遲恭洗馬處 十三山 二郎洞山 清擒洪承疇處 紫金朝旭 虹螺山 筆架
石橋 牛心山 吳三桂故宅 大廣濟寺 普陀寺 老虎洞 避暑宮 北鎮廟
青岩寺 賀欽墓 王珣墓 姜女廟 和龍宮

二

東邊

一八一—二二一

中華名勝古蹟 第二十編 目錄

二

老城 三關 永陵 鳳凰山城 望海塢 毛文龍被害處 四公園 黑山礁

凌水寺 天后宮

三 洮昌

..... 一一一—一一一

阿密山 湧泉

中華名勝古蹟續編

第二十編 奉天

一 遼瀋

實勝寺

實勝寺在瀋陽小西關外。俗曰黃寺。隸於蒙古喇嘛。清太宗破明兵十三萬於松山。敕建此寺。規模宏偉。殿宇巍峨。內藏清太祖甲冑。太宗弓矢。清高宗賜額曰海月藏輝。並作瞻視甲冑弓矢詩。歌供佛爲邁達里。歲首祭典。俗有跳塔之戲。中又有嗎哈噶拉樓。太宗天聰九年。元裔察哈爾林丹汗之母。以白駝載瑪哈噶拉佛金像。並金字喇嘛經。傳國璽至此。駝臥不起。遂建此樓。清時曾下敕重修。

法輪寺

法輪寺在瀋陽地載門外。清高宗有法輪寺詩。又德盛門外有廣慈寺。外攘門外有延壽寺。撫近門外有永光寺。四寺各有白塔一座。法輪寺曰北塔。廣慈寺曰南塔。延壽寺曰西塔。永光寺曰東塔。號稱瀋陽四塔。此四塔用喇嘛相地法建造。云當一統。相傳爲異。並清初敕建。有大學士剛林碑。

長寧寺

長寧寺在瀋陽西北五里。本清初御花園。順治十三年敕賜爲寺。清高宗有長寧寺詩。內藏清太宗所遺冠服。高宗亦有詩。瀋陽著名叢林之一也。地與北陵近。遊陵者輒順道隨喜焉。

賢王祠

賢王祠在瀋陽外攘門外。祀通達郡王、武功郡王、慧哲郡王、宣獻郡王、禮烈親王、饒餘親王、鄭簡親王、穎毅親王、怡賢親王及睿親王、豫親王、肅親王、克勒郡王等。清時春秋致祭。立有石碑。祠宇極爲宏壯。

鐘鼓樓

鐘鼓樓在瀋陽城中街。崇樓兩層。聳峙其中。往來車馬。出入其下。登臨樓上。可瞻眺四方。山川市井。盡收目中。

古塔山城

瀋陽縣東南四十里有古塔山。上有古城。周二里半。東南一門。塔一座。去山六里。又有架板山。山之東又有歪頭山。上亦有古城。周一百九十五步。東南一門。並不知何時所建。

清克勤郡王岳託墓

克勤郡王岳託墓在瀋陽城南五里。白塔之西。岳託清太祖孫禮親王代善之長子也。有謀勇。隨太祖太宗征伐。與薩哈璘輩。協心輔政。遂立開創之基。每戰奮勇當前。不避矢石。崇德三月。以疾薨。太宗爲之輟飲食三日。封多羅克勤郡王。後聖祖爲立碑以紀其功。高宗二次親酌其墓。

何和哩墓

何和哩墓在瀋陽城南六十里。何和哩清滿洲正紅旗人。其先居棟鄂爲部長。因以地爲氏。何和哩幼而凝重。志量寬和。年二十六。卽長其部。太祖納妃哈達。身率甲士護行。遂率所部來歸。尙固倫公主。授一等大臣。從征烏拉。取遼陽。皆有功。特蒙眷泣。與費英東、額亦都、扈爾漢、安費揚古爲五大臣。事太祖三十餘年。推誠宣力。授世職三等子。卒時。費英東等俱已先歿。太祖慟哭曰。朕股肱諸臣。何不遺一人耶。順治中。追諡溫順。

清武勳王揚古利墓

揚古利墓在瀋陽城北十一里。揚古利滿洲正黃旗人。姓舒穆祿。父郎桂。爲庫爾喀部長。命揚古利入侍太祖。以女妻焉。郎桂爲部人所害。其母攜幼子屬韃佩刀。突圍來歸。庫爾喀部衆尋亦內附。揚古利逆其讐家。殺之。啖其耳鼻。時年甫十四耳。後從太祖征輝發、烏拉。擊明兵。每戰必衝鋒挫銳。身先士

卒。大小百餘戰。被剝滿身。戰功最著。崇德二年。從征朝鮮。有敗兵竄伏厓間。竊發。鳥鎗揚古利。傷重而卒。臨歿之日。太宗親臨喪次。哭之。命本牛祿八戶守家。追封武勳王。以子塔襲超品公。順治初。配享太廟。康熙戊寅。聖祖東巡。親至墓奠醢。二十九年。御製碑文表其墓。後高宗亦嘗奠醢之。有賜奠詩。

費英東墓

費英東墓在瀋陽縣北五里。費英東。滿洲鑲黃旗人。姓瓜爾佳。太祖初。從其父索革。和率所部來歸。授一等大臣。國有征討。莫勿隨從。戰功甚盛。授三等子世襲。費英東爲人忠直。敢強諫。獎善黜惡。畢智殫力。以佐成大業。乃卒。太祖親臨其喪。復臨其墓。太宗卽位。追封直義公。配享太廟。順治十六年。追倫佐命功第一。晉三等公。世襲。聖祖世宗高宗。皆嘗親酌其墓。乾隆四十三年。以費英東爲開國功臣之冠。特晉一等公。

額亦都墓

額亦都墓在瀋陽縣東十五里。額亦都滿洲鑲黃旗人。姓鈕祜祿。世居長白山。父母爲仇家所害。年十三。報仇避依姑家。太祖過其地。捨姑家從之。初令討尼堪外蘭於圖倫城。奮勇先登。又取巴爾達城。會河漲。以繩連軍士而度。乘夜登城。城上飛矢貫股。著於雉垣。被五十餘創。不退。卒拔之。凡征哈達、輝發、烏拉、赫葉諸役。皆在事有功。界藩之戰。大破明兵於吉林。匡薩爾濟山。及破明總兵馬林、劉綎兵。俱爲前鋒。肯先陷陣。自弱冠從征。討歷數十年。攻城野戰。未嘗敗衄。前後所得賞賚。悉分與有功士卒。不以自私。太祖初妻以族妹。復以和碩公主降焉。功至一等大臣。卒。天聰元年。追封弘毅公。配享太廟。子敖德邁必隆。並爲名臣。後聖祖高宗並親酌其墓。高宗並有賜奠詩。

達海墓

達海墓在瀋陽縣東南五里。達海滿洲正藍旗人。姓覺爾察。其祖博洛來歸。父艾密禪。任散秩大臣。達海九歲。卽通滿漢文義。太祖使居內廷。司文翰。每

草詔令稱上旨。使正訂國書。達海更爲對音切字。令文義周密。用以譯明會典。素書三略諸書。莫不稱善。授輕車都尉世職。天聰六年病卒。年止三十八。謚文成。康熙八年。其孫秘書院學士禪布乞立碑。聖祖以達海通滿漢文。所增加字義。於今賴之。著省勞績。乃追立碑石焉。

黃龍岡

黃龍岡在開原縣北三里。卽古黃龍塞。唐書契丹傳。黃水之南。黃龍之北。遼史。上京北帶潢水。南控黃龍。並其處。唐置黃龍戍於此。其地山勢芊綿。委蛇起伏。東連巨嶺。西抵邊河。儼如臥龍之狀。清時插柳爲邊。以限內外。謂之新邊。

石塔

石塔在開原縣城西南隅。高二百餘丈。十二層。亭亭矗立。上干雲霄。相傳金宣徽弘理大師葬此。塔下舊有寺。曰石塔寺。

石門山

石門山在遼陽縣南四十里。舊有石門砦。明萬歷中，李如松救朝鮮，遂出於此。

千朵蓮花山

千朵蓮花山在遼陽縣南六十里。一名千山。北起襄平，南界風海，綿亘二十餘里。峰巒聳秀，狀若蓮花，故名。世傳唐征高麗，駐蹕於此。山有祖越、龍泉、香岩、大安、中會五寺，及無量觀、白雲觀、南泉庵等。就中以南谷香岩爲最勝。重峯疊嶂，環抱於外。古松奇石，錯置其前。右澄龍潭，左矗白塔。後聳高閣，旁安精舍。風物之佳，殆逾桃源。寺中有一老松，天矯如龍，高踰樓櫓，蒼枝鉞葉，濃陰蔽日，乃數百年物也。峯之著名者曰蓮花、月芽、獅子、彌勒、淨瓶、鉢盂、海螺、漱瓊、松苔。上夾下夾、筆架等。有石佛、片石、花岩、三巖、臥象、仙人、歇涼、猷寶、鷓鴣五臺、太極、煉魔、木魚、鸚哥四石。又有振衣岡、羅漢洞、石洞、玉皇閣、萬佛閣。

松石屏、濯纓泉、松門雙井、西湖井、仙人奕棋石、枰諸勝蹟。全山巉岩峭壁，潛壑深潭。松柯獸石，密樹虯藤，奇花異卉，真不啻洞天福地。遼東山水首屈一指焉。沙河發源於此。

東京城

東京城在遼陽縣東北八里。太子河東。清太祖天命七年建。周六里十步。東西廣二百八十丈。南北袤二百六十二丈。門八。東向者左曰迎陽，右曰韶陽。南向者左曰龍源，右曰大順。西向者左曰大遼，右曰顯德。北向者左曰懷遠，右曰安遠。城東北五里一冢巍然，乃清和碩親王舒爾哈齊墓也。

金宮殿

金宮殿東遼陽城北。金熙宗皇統四年立。寢殿曰保寧，宴殿曰嘉惠。前後正門曰天華，曰乾貞。又建宗廟。有孝寧宮。七年建御容殿。今碧瓦朱甍，雖非曩昔。然垣墉基址，猶可按而得也。

廣祐寺

廣祐寺在遼陽城西門外。有白塔。俗呼白塔寺。內有自來佛一軀。相傳前代有鄉民貿易廣寧。路遇童子曰。我往廣祐寺。能負我往。以銀布相酬。其人諾之。數百里不終朝而至。抵寺則一金身佛像也。數人舁之不動。寺僧異之。酬以銀布。天聰九年重修。康熙二十一年四月。聖祖幸寺。賜袈裟。寺周可二三十里。爲邑之大叢林。而門對千山。嵐翠萬重。風物勝絕。

清穎親王薩哈璘墓

穎親王薩哈璘墓在太子河南。平頂山下。薩哈璘清太祖孫禮親王代善第三子也。天資聰敏。通滿漢蒙古文。屢從征伐。所向必克。清太宗稱尊號。輔贊朝政。厥功甚偉。崇德元年四月。議功封多羅郡王。五月二十七日薨。追封和碩親王。六月。賜祭太牢。康熙十年。追諡曰毅。

清誠毅貝勒穆爾哈齊墓

誠毅貝勒穆爾哈齊墓在東京城東北。穆爾哈齊清顯祖庶子也。驍勇無匹。嘗隨征哲陳郡。以八十人略地深入。敵兵八百人猝至。太祖與之直前衝擊。敵衆敗走。追至吉林岡。立於巔。潰卒十餘人忽趨上。太祖射一人。貫其脊。顛穆爾哈齊又射一人。殪之。餘驚悉墜崖死。及薨。太祖親奠之。順治十年。追封多羅貝勒。諡壯勇。

蓮花山

蓮花山在蓋平縣東南一百八十一里。上有天門石室。羣峯疊翠。秀若芙蓉。俗呼蓉華山。峯巒泉壑。風物絕佳。

花兒山

花兒山在蓋平縣東北三十里。相傳上有樹一株。高丈餘。遠近望之。大小如一。不知何名。開小白花。其葉凌冬不凋。犯者輒病。土人神之。

黃花老人修仙處

蓋平縣西南十五里伴仙山。爲明天順中黃花老人修仙處。老人不知何許人。有道術。在山寺修煉。閱數年。乘鶴昇舉。後人因名山曰伴仙山。亦曰半仙山。

煉丹臺

煉丹臺在海城縣西二十里。相傳仙人白仲理煉丹處。遼置仙鄉縣。因此。

尉遲恭洗馬處

海城縣南八里河洗馬澗。相傳唐尉遲恭隨駕征高麗。洗馬於此。

十三山

十三山在錦縣東七十里。高一里餘。周二十里。峯有十三。故名。上有金牛洞。下有池。峯巒羅列。大小相錯。出山海關卽能見之。凝嵐積翠於大荒中。若遠若近。宛若圖畫。塞上一奇觀也。

二郎洞山

二郎洞山在錦縣北十五里。上有五洞。洞東北一潭。深丈許。其東有一泉。上舊有玉皇閣、彌陀閣、望海觀音閣。惟觀音閣最高。東見十三山。西見葫蘆島。南見大小筆架山。山下則錦水凌川。環旋左右。瞻眺景物。殊堪游賞。

清擒洪承疇處

錦縣南十八里松山。清太宗破明兵十三萬於此。殺巡撫邱民仰。前屯衛總兵王廷臣、玉田總兵曹變蛟等。生擒總督洪承疇等歸盛京。至今經履是地者。故老指曰。此擒洪承疇處也。

紫金朝旭

錦縣雙羊店附近有紫金山。高三百丈。綿亙十餘里。峯回岡旋作九字形。每屆朝曦初上。遠暎山灣。金霞紫彩。景物萬狀。名紫金朝旭。爲錦邑八景之一。

虹螺山

虹螺山在錦縣。有二。一曰小虹螺山。在縣西六十里。周二十里。高橋河七里。

河發源於此。上有朝陽宮、龍泉寺、望海寺、藏紅樓。其巔又有天台洞及虹螺女之梳粧臺。全山植果樹，多桃杏之屬。大虹螺山與小虹螺山對峙，高五里許。周五十餘里，東西綿亙百餘里。女兒河環流其中，二山相距十餘里。金時於上置虹螺寨。明時因山勢築城其上，以爲障。連山河發源於此。

筆架石橋

綿縣西南六十里有大小筆架山，並峙海中。兩山相對，形如筆架。潮時四面皆水。潮退則有石如橋。在小筆架山者廣八丈，長四里許；在大筆架山者廣三四丈，長三里許。舊時上有長元寺。寺西有一泉，味極甘冽。山南又有一洞焉。

牛心山

牛心山在綿縣北二十五里。樹多桃杏果木。每屆花時，則緋紅爛漫。及至結實，則青紫累墜。有寺曰巖靜，一古刹也。

吳三桂故宅

吳三桂故宅在錦縣城內東大街。規模壯偉。惜半就傾毀。相傳三桂出關時居處也。

大廣濟寺

大廣濟寺在錦縣城內。唐建。有白塔。遼道宗建。金高瑾有記。又有大佛寺。寺前有塔。周四十餘丈。高可百丈。相傳建於唐時。

普陀寺

普陀寺在錦縣北十八里觀音洞左。明正統初建。洞中有百佛百餘。及羅漢像。大士像。且有清泉。甘冽可飲。山頭樓閣參差。山下河流縈迴。足擬落迦之勝。因曰普陀。

老虎洞

老虎洞在京奉鐵道打虎山站後山上。乃幽冥深邃之石洞也。洞外山上有

古牆。左近有石碑。文字殘缺。頗難辨讀。

避暑宮

避暑宮在北鎮縣西四十餘里闔山上。因一名闔山行宮。乃清高宗避暑處。相近有望海寺。殿宇樓臺。錯置於林木之間。春夏之際。遊人集焉。

北鎮廟

北鎮廟在北鎮縣西。醫巫闔山之陽。去山五里。距城三里。隋開皇十四年。詔於山立祠。唐天寶十載。封山神爲廣寧公。宋金加王號。元大德二年。封貞德廣寧王。明改稱北鎮醫巫闔山之神。清因之。舊廟毀於元季。明永樂十九年。敕建。前殿五楹。中殿三楹。後殿七楹。又構御香樓五楹。以貯朝廷降香。成化間重修。清代亦疊次修葺。中有石碑甚夥。多可摩挲讀也。

青巖寺

青巖寺在北鎮縣西南五十里。峭壁插天。中有洞。可容數十人。洞外東西有

泉。縈洄環注。有望海觀音閣。洞前刻虛無真境四字。每遇清明。海洋在目。遼左諸山。歷歷可數。障鷹臺在其上。

賀欽墓

賀欽墓在醫巫閭山。欽字克恭。其先定海人。以戍邊籍義州。少好學。成化二年進士。授戶部給事中。已而師事陳獻章。既歸。肖其像事之。弘治中爲陝西參議。未至而母死。乃上疏懇辭。且陳四事。一資真儒。以講聖學。二薦賢才。以輔治道。三遵祖制。以處內官。四興禮樂。以化天下。疏凡數萬言。奏入報聞。欽學不務博。專讀四書六經小學。期于反身實踐。謂學不必求之高遠。在主敬以收放心而已。隱居醫巫閭山下。別號醫閭。有集四卷。

王珣墓

王珣墓在義縣西四十里。珣字君實。本姓耶律氏。金末避難遼西。更姓王。遂爲義州開義人。武力絕人。善騎射。穆呼哩略地錫。珣率衆出迎。以珣爲元

帥兼領義川二州事。後充兵馬都元帥。鎮遼東。便宜行事。兼義川等州節度使。珣爲政簡易。賞罰明信。誅強扶弱。毫髮無徇。

姜女廟

姜女廟在綏中中前所城西二十五里望夫山。祀秦貞婦許氏孟姜。宋文天祥有聯云：「秦王安在哉。萬里長城築怨。姜女未亡也。千秋片石銘貞。」前有望夫石。石上有亂杵蹤。相傳卽孟姜望夫之處。清高宗有姜女祠及望夫石詩。

和龍宮

和龍宮在錦西縣城西。慕容皝時。有二龍合在一山。交首嬉翔。見之大悅。改所築宮曰和龍宮。

一一 東邊

老城

老城在興京城南八里。周十一里六十步。門四。城內西有小城。周二里一百二十步。門二。城外有郭。自城北至城西南共九里有奇。亦有四門。清丁太祖亥年築。癸卯自此遷都興京。因曰老城。

三關

三關並在興京。頭道關在城西四十里。卽雅爾哈山關。二道關在城西四十一里。卽代岷山關。三道關在城西六十三里。卽札喀山關。皆因山爲關。天命四年正月清太祖征葉赫。命大貝勒等率兵五千。往守札喀關。防禦明兵。卽三道關也。高宗有過三關詩。

永陵

永陵在興京城西北十里啟運山。清太祖以上諸帝叢葬所也。曰肇祖、興祖、景祖、顯祖共一山。寶城周十五丈四尺。前有享殿碑亭等。規模制度。守護官祀典等。悉如福陵昭陵同。初肇祖興祖共葬此。稱興京陵。景祖顯祖葬奉天。

城東南一百二十里之積慶山。曰東京陵。順治十五年。移東京陵。改祔興京陵。閱年。遂改稱興京陵。曰永陵。陵之左右各有一冢。左者乃多羅武功郡王禮敦巴圖魯墓。右者乃多羅恰恭貝勒塔察芬古墓也。

鳳凰山城

鳳凰山城在鳳城縣東南五里鳳凰山上。疊石而成。可容十萬之衆。不知何時所築。或云建自唐時。然無可證。

望海塢

望海塢在金縣東北六十里。地高可駐兵千餘。明洪武初。都督耿忠築堡其上。以備倭寇。倭寇至必先經此。濱海咽喉地也。永樂十七年。總兵劉江復增築之。後倭寇至。江設伏於此。盡殲其衆。

毛文龍被害處

金縣西南一百四十五里過島。明崇禎二年己巳夏。袁崇煥殺左都督毛文

龍於此。

四公園

四公園在大連。曰電汽公園。曰常盤公園。曰西公園。曰北公園。之四園以電汽公園爲最。入夜燈火煌煌。如同白晝。中有曲沼茅亭。珍禽異獸。球室冰場。頗足遊觀。其次爲西公園。林木陰森。景物清幽。

黑山礁

黑山礁在大連市外十里許。石皆黑色。故名。日人名曰星之浦。其地倚山面海。風物至佳。道路如砥。林木陰濃。夏時嘗多避暑於此者。

凌水寺

凌水寺在黑山礁附近之樂家屯。清乾隆時建。有石像二十餘尊。四圍有巉岩峭壁。老樹古松。風物之清奇。境地之幽靜。又非黑山礁可比。惜不爲世人所重。且其地多梨樹。每屆花時。尤爲佳勝。殆所謂世外桃源也。

天后宮

天后宮在旅順三溝子。入門前有殿。後有樓。兩旁爲甬道。甬道多古木。頗堪避炎。樓甚宏崇。廊有石碑。述清光緒時重建此寺之緣由也。明晰可讀。

三 洮昌

阿密山

阿密山在懷德縣西。山形聳峙。林木青蔥。南有洞。北有泉。清冽可飲。

湧泉

湧泉在突泉縣北。歎湧而起。泉底粒粒如貫珠。因名湧泉。一名珍珠泉。惟有時涸。數月無水。有時則清澄一泓。可以鑑髮。終歲不枯。

中華名勝古蹟續編目錄

第二十一編 吉林

一 吉長

尼什哈山 北山 公園 松江樓 紀念碑 避火圖

一—三

二 濱江

哲勒屯山 許公路紀念碑

三—四

三 延吉

長白山 天女沐浴處 貞觀石柱 畢爾騰湖 歐孝子故里 石佛寺 尉遲恭

四—九

隄

四 依蘭

佛爾和山

九—九

中華名勝古蹟 第二十一編 目錄

中華名勝古蹟續編

第二十一編 吉林

一 吉長

尼什哈山

尼什哈山在吉林城東十二里。周十里。高三百步。其上有城。周二里。城西一井。木生其中。旁有鱒魚池。三石砌。清乾隆十九年。高宗東巡。有尼什哈山詩。曩時吉林將軍。凡祈晴雨。皆於是山。

北山

北山在吉林城西北。上有關帝廟。玉皇廟。藥王殿。宮宇巍峨。殊形壯麗。乃近人所新修。夏曆四月廿八日。爲廟會之期。異常熱鬧。登山之巔。遙見城市。而松花江蜿蜒如龍。亦收眼底。省中登臨勝地也。

公園

公園在北山下。茅亭竹軒。布置楚楚。依山建築。亦足遊觀。中有植樹園。內中諸樹。爲省中文武官吏所手植者。

松江樓

松江樓在吉林城外。爲紳士松秀濤所築。樓高三層。聳峙江濱。登臨其上。憑欄俯瞰。則波瀾浩蕩。舟楫往來。風物之佳。足開襟懷。

紀念碑

紀念碑在吉林省長公署轅門外。清巡撫朱家寶撫吉有德政。民爲立是碑。以誌紀念。高三丈許。下大上銳。有文曰滇南朱經田中丞紀念碑。

避火圖

避火圖在吉林北極門外。省垣恆多火。民乃磨石爲碑。面刻坎卦。黑文白地。立於山上。藉以禳災。因曰避火圖。

二 濱江

哲勒屯山

哲勒屯山在賓縣東北。峯巒盤旋。巖壑幽深。多林木。一望青葱。風景至佳。南有畢朗臺。相傳遼時有畢朗克利和者。嘗居於此。

許公路紀念碑

許公路紀念碑在哈爾濱許公路齊齊哈爾街拐角。共和十二年五月建。碑之四周。設立木柵。柵內遍植樹木花草。碑鐫記文曰。一哈爾濱地處東陲。縮穀吉黑。枕歐襟亞。水陸通衢。全埠交通。自南崗以達傅家甸。原有羊腸小徑。峻阪崎嶇。陂陀不治。行旅裹足。輸送繞道。再踰軌脊。強相通隸。吁其憊已。中俄交通。鴻溝顯畫。民國十一年四月。余奉命蒞督東路。商諸同人。乃屬路局。挹資循故迹。闢馬路。越月竣之。請名。余維哈埠肇興。以東路。東路之成。由前督辦文肅許公。秉節隣邦。手訂合同。其所爲。胚胎始而竟終。輯國而輯民者。宏

且遠矣。何可泯乎。因以許公路名之。尙賢彰本之意。庶亦人心所同歟。是爲記。東省鐵路督辦永平王景春撰文並書。會辦俞人鳳等同建。

三 延吉

長白山

長白山在本道境。距吉林城東稍南六百里。古名不咸山。亦名太白山。又名白山。一名徙太山。滿洲語呼爲果勒珊延阿林。朝鮮人則呼爲白頭山。不咸之名。始見於山海經。徙太二字。乃見於魏書。太白之名。亦見於魏。而長白之名。則見於金山。山高九千尺。橫互千餘里。東北行者。斜迤入俄屬東海濱省。與外興安嶺遙接。南行者。直貫朝鮮東南部。西南行者。入奉天爲千山山脈。山陰之水。匯於黑龍江。遼河山陽之水。注於圖們。鴨綠二江。山上有湖曰圖們泊。又曰闔門潭。一名天池。又因湖上雲霧溟濛。水鳴如鼓。以爲有龍潛於中。曰龍潭。湖周八十里。成橢圓形。淵深莫測。嚴冬不冰。水面有浮石。狀如肺臟。

名浮海石。水自西角溢流爲瀑布。驚川聒谷。懸溜千仞。景物壯奇。鴨綠圖們。松花三江。發源於此。其巔多積雪。少草木。不易上登。金太平十二年封長白山神。爲興國靈應王。卽其山北地建廟宇。明昌四年復冊爲開天弘聖帝。清代尊爲長白山之神。而無封號。志稱康熙十七年。高宗派遣大臣覺羅武穆納。登山巡視。見山麓一所。四周密林叢翳。其中園平。草木不生。出林里許。香樹行列。黃花紛郁。山半雲垂霧翳。不可仰睇。諸大臣跪宣旨畢。雲霧倏廓。山形瞭然。有徑可登。其半有石砌臺。坦平宜四望。山巔作圓形。積雪皚然。及陟其上。五峯環峙。南一峯稍下如門。中潭窈杳。距岸五十丈許。云云。按中言跪禱雲開。語極怪誕。須知山高雲盛。自是恆常。時集時散。何關仙靈。若必以專制帝王之尊。足脅山神。撥開雲霧。謬矣。要之長白山爲滿清發祥之地。當時奉命之臣。故作玄妙縹緲之辭。神其說。以愚民自愚而已。

天女沐浴處

長白山東有布庫哩山。山下有池。曰布勒瑚哩。爲天女沐浴處。池邊有石。鐫曰天女浴躬處。實錄云。相傳有天女三人。長曰恩古倫。次曰正古倫。季曰佛古倫。浴於池中。有神雀銜朱果。置季女衣。季女含口中。忽已入腹。遂有身。尋產一男。生而能言。體貌奇異。及長。母告以吞朱果之故。因錫之姓。爲愛新覺羅。名之曰布庫哩雍順。與小舫乘之。遂凌空去。舫順流至一河步。于是登岸。折柳及蒿爲坐具。端在其上。是時其地有三姓爭爲雄長。日構兵仇殺。有取水河步者。見而異之。歸語人曰。汝等勿爭。吾取水河步。見一男子。察其貌。非常人也。天不虛生此人。衆往觀。皆以爲異。因詰所由來。答曰。我天女所生。天生我以定爾等之亂者。且告以姓名。衆曰。此天生聖人也。不可使之徒行。乃交手爲鼻。迎至家。三姓者議推爲國主。以女妻之。奉爲貝勒。其亂乃定。遂居長白山東鄂多哩城。國號滿洲。是爲開基之始。越數世。遭寇亂。宗族多遇中。有幼子遁于荒野。賊追之。會有神鵲止其上。追者遙望鵲棲處。疑爲枯木。害

道而返。乃得免。隱其身以終焉。又再傳爲肇祖原皇帝。按此云云。無非狂天生之陋見。侈受命之禎祥。帝武玄鳥。不辨自明。遊其地者。觀彼石刻。一笑置之可也。

貞觀石柱

貞觀石柱初埋沒於地。前清時日本人掘地得之。刻有唐貞觀年等字。乃知此爲唐時物。遂藏延吉廳署內。

畢爾騰湖

畢爾騰湖在寧安城西南一百里。卽湖爾哈河之上流也。城西南水俱滙於此。廣五六里。袤七十里。土人名曰畢爾騰。中有三山。名鄂摩和昂阿山、阿克善山、牛泉山。阿克善、牛泉兩山之間有岩曰白岩。湖之西南有一厓曰呼克圖厓。湖水東注。飛瀑跳空。奔浪雷吼。聲聞數十里。土人名曰發庫。自此東流繞古會甯城。歷九十餘里。經縣南而東北流。爲湖爾哈河。新唐書渤海王城

臨呼爾罕海。卽此。

歐孝子故里

歐孝子故里在寧安城東。明監生歐某。家有妖狐爲患。有善治若。燻死數狐。老妖益引黨類作祟。已魅死臧獲數十人。且聲言將殺歐某之母。旣而母果病。至危篤。歐某割腰以進。俄聞狐語曰。此人割股孝親。天已增其母壽十年矣。遂去。不復爲患。後十年母以壽終。

石佛寺

石佛寺在寧安城西南六十里。古大城南隅。相傳金時慈聖太后建。有石佛高三丈餘。後石首墜地。石工欲鑿爲碾。甫舉錘。頭涔涔痛。遂置之。是夕土人同感異夢。於是舉石首湊法像。治鐵固之。重建寺宇焉。

尉遲恭隄

尉遲恭隄在琿春圖們江北沿。世傳唐尉遲敬德所築。因名。左近山上。舊有

一寺亦傳爲其所修。寺後有一鐵柱。上鑄尉遲恭監工字。

四 依蘭

佛爾和山

佛爾和山在富錦縣窩金山附近。峯巒不高而峭。巖岫嶺巘。盛樹木。柯幹鬱茂。王暉詩「憚厓老樹纏冰雪。石觜枒杈橫積鐵。」冬時景况彷彿似之。



中華名勝古蹟續編目錄

第二十二編 黑龍江

- 一 龍江……………一一三
龍沙公園 東湖別墅 圖書館 塔子城塔 乃顏故城 金人長城
- 二 綏蘭……………三一一
庫魯勒圖山
- 三 黑河……………三一一
雅拉古山
- 四 呼倫貝爾……………三一四
呼倫泊 貝爾池

中華名勝古蹟 第二十二編 目錄

中華名勝古蹟續編

第二十二編 黑龍江

一 龍江

龍沙公園

龍沙公園在龍江城西南。清程雪樓建。內有課農話圃堂。龍沙萬里亭。未雨亭。六角亭。澄江閣。及噴水池。秋千架。網球場。烤啡館。茶室。飯莊等。綠樹扶疏。名花爛漫。流泉成沼。疊石爲山。池碧印天。苔蒼鋪地。開軒眺望。足以怡情。據几品茶。亦堪叙懷。洵邊陲之勝地也。

東湖別墅

東湖別墅在龍江城東南。清周天門勗建。亦有花木亭軒之勝。惟不及公園耳。內湖水一泓。清光漾蕩。風趣最佳。

圖書館

圖書館在龍江城。西亦周氏建。層樓聳峙。極形壯麗。樓頂可梯而登。憑欄遙望。則山川城市。盡收眼底。雲煙萬狀。風景勝絕。館中收藏圖書。計十萬卷。可隨意披閱也。

塔子城塔

大賚縣北有塔子城。有古塔在其間。聳立突兀。相傳遼金時所建築也。

乃顏故城

乃顏故城在拜泉縣通肯河頭道溝南。兩城聯屬。元世祖統一中夏。北邊諸王不服。統漢兵滅乃顏。即此。

金人長城

金人長城一名泰州邊堡。起布西哈特。直達歸花城等處。金時兀朮破宋。乘勢而驕。爲蒙古所敗。因築此以爲防禦。

二 綏蘭

庫魯勒圖山

庫魯勒圖山在龍鎮縣西。數峯矗起。遙望如筍。岩岫深邃。林木幽秀。下有一泉。終歲澄澈。清康熙時曾涸竭。越年源頭復活。至今猶在也。

三 黑河

雅拉古山

雅拉古山在蘿北縣佛思亭山附近。岡巒蜿蜒。形勢偉壯。岩壁嵯巖。最爲嶽險。山深處有谷。幽邃可容。谷外岩嶂蔽之。非幽入者。恆不得見。其處樹木翳翳。景物絕勝。

四 呼倫貝爾

呼倫泊

呼倫泊在臚濱縣南。一名達賴泊。亦曰札來諾爾。又曰呼倫湖。周四百里。水

鹹。有潮汐。受特爾根河、貝爾泊、烏爾順河。明成祖三次親征出塞。經濶灤海子。卽呼倫泊也。

貝爾池

貝爾池亦在臚濱縣南。亦稱貝爾泊。卽捕魚兒海也。明太祖逐元順帝出塞。洪武二十一年命藍玉、王弼北征。元主脫古歡帖木兒遁。大勝於捕魚兒海。卽此。

中華名勝古蹟續編目錄

第二十三編 新疆

一 迪代……………一—四

西湖 紅山 呼瑪爾泉 說園 龍王廟 張蔭桓墓 古城 千佛洞 回王墓

蘇巴什湖

二 塔城……………四—四

塔勒爾山

三 伊犁……………四—九

博克達爾山 東岡碑 格登山碑 西方淨海 塔勒奇山 博果園

四 阿克蘇……………九—一〇

色伯台山 溫泉

五 焉耆

..... 一〇一

玲瓏窩 羅布泊 蘇剛塔 且末故城 飲馬河

六 喀什噶爾

..... 一一一

葉爾羌碑 伊西沮庫爾淖爾碑 二滂壩 禮拜寺 奎星閣 耿公井 香妃墓

七 阿山

..... 一五一

哈朗提斯山 將軍山

..... 一五六

中華名勝古蹟續編

第二十三編 新疆

一 廸化

西湖

西湖在廸化城外紅山下。一名鑑湖。湖雖不廣。然綠波瀲灩。隄柳舞颺。風物清幽。且湖中建有水榭。架梁通之。明軒敞暢。納涼尤佳。左右又有龍王廟。水磨廠等。峻宇朱薨。亦堪娛目。尤爲省中名勝之冠。

紅山

紅山在廸化城東。峯巒峻峭。岩岫幽深。踞高眺望。則山川廬舍。盡收眼底。山上多佛寺。蘭若毘連。浮屠屹立。殊堪遊觀。其東北山嘴有關帝廟。卽俗所謂紅廟子也。蓋牆垣塗丹。故云。關外土人稱廸化爲紅廟子。以此。

呼瑪爾泉

呼瑪爾泉在迪化南。清流疊疊。涓涓不絕。水味甘冽。不讓慧泉。惜在西部。湮沒勿彰。徒資爲牛馬飲耳。

說園

說園在迪化東門外。卽農事試驗場。中有一葦亭。夢魚亭。晴照軒。霞照樓等。百卉紛披。羣芳妍麗。布置楚楚。景物絕佳。其居中爲不繫山房。有清王樹枏方伯聯曰：「異種千年。苜蓿秋風思漢室。長城萬里。桃花流水夢秦人。」

龍王廟

龍王廟在迪化東水磨溝。廟踞坡上。無甚可觀。惟廟左有涌泉。澄澈可飲。廟前有園亭。景物絕幽。乃清王室載瀾流新省時所建。間又爲潘效蘇所築者。潘新疆巡撫也。

張蔭桓墓

張蔭桓墓在迪化城紅塔間。巍然聳峙。頗爲巨大。蔭桓曾出使英國。光緒二十五年以事戍新疆。二十六年奉旨正法。因葬於此。

古城

孚遠城北三十里有古城。唐北庭都護府治金滿故城也。土人呼曰唐王城。周二十餘里。

千佛洞

千佛洞在孚遠城西南十里。洞中多佛像。寶相儼然。有一臥佛。長二十尺。洞外有寺。境地頗爲幽妙。香火甚盛。每歲夏歷六月初有千佛會。士女畢集。尤極一時之盛。附近有王母宮。殿宇宏壯。亦足遊覽。

回王墓

回王墓在哈密回城西。外繚以垣。爲花鬘輒所築。頗爲美觀。北向有門。入內有可蘭經碑二。再進則陵在焉。陵爲長方形。殊高大。其周圍多小冢。蓋回王

之祖孫父子。皆叢葬於此。

蘇巴什湖

蘇巴什湖在哈密城北。中有鏡涵亭。養元亭。憑欄俯視。則清澄見底。遊鱗可數。遙觀岸上。則柳條搖曳。婀娜臨風。而山阜坡上。又有殿宇崇宏。高聳其間。蓋龍王廟。劉猛將軍廟。明公祠等也。風景之佳。不似邊陲。迨夫輿闌上陸。入游諸廟。則神像莊嚴。廊軒幽雅。又令人徘徊瞻仰。而不忍遽去焉。

二 塔城

塔勒爾山

塔勒爾山在塔爾巴哈台東西。峯巒層峙。岡隴蜿蜒。形勢雄秀。岩岫幽深。登巔眺望。額米爾河。潑洄如龍。邊陲景物。盡目目中。

三 伊犁

博克達爾山

博克達爾山在伊寧縣北。峯嶂矗起。狀如蓮花。東有山曰納額巴山。南有一洞。土人云深十里。幽冥邃遠。未敢入探也。

東岡碑

東岡碑在伊寧城東岡上。清乾隆時建。刻文兩篇。四體字書。一爲御製平定準噶爾勒銘伊犁之碑。曰。一惟天盡所覆。仰我皇清。罔不在宥。惟清奉昊天。撫薄海。兆庶悉主。悉臣。太祖太宗世祖。肇基宅中。皇者其武。聖祖世宗。觀光揚烈。克臻郅隆。逮予藐躬。思日孜孜。期海內同風。咨汝準噶爾。亦蒙古同類。何自外携。數世梗化。篡奪相仍。顧碩仇其下。厥達瓦齊。甚毒于醒。衆心疵疢。如苗斯蠹。如虺斯螫。衆口嗷嗷。視爾嗷止。予焦勞止。期救不崇朝。止視爾底止。予噫嘻止。亟出汝塗泥止。迺命新附爾爲先鋒。熟悉其路。迺命勁旅。攜數月糧。毋或掠擄。師行時雨。王旅嘽嘽。亦無遼阻。左旋右抽。王旅渾渾。旣暇以休。烏魯木齊。及五集賽。度之折折。台吉宰桑。迎降恐爲。奚事斧吭。波羅塔拉。

闕爾奇嶺險如關。闔倒戈反攻。達瓦齊走。旦夕塗窮。回部遮獲。彼鼠斯喙。地人無隙。露布飛至。受俘午門。爰貸其罪。自今伊始。四部我臣。伊犁我宇。世曰綽羅斯。及都爾伯特。和碩特。渾特。封四可汗。衆建王公。遊牧各安。宰桑公臣。屬我旗籍。誰我苦辛。爾恭爾長。爾孳爾幼。徐以教養。爾駝爾牛。爾羊爾馬。畜牧優游。分疆各守。毋相侵陵。以干大咎。齊禦外域。曰布魯特。越哈薩克。醉飲飽食。敬興黃教。福自天錫。伊犁平矣。勒貞珉矣。於萬斯年矣。一一爲御製平定準噶爾後勒銘。伊犁之碑曰。一天之所培者。人雖傾之。不可殛也。天之所覆者。人雖裁之。不可殖也。嗟汝準噶爾。何狙詐相延。以世而爲賊也。彊食弱衆。凌寡血入于牙。而蔑知悛易也。云興黃教。敬佛菩薩。其心乃如夜叉羅刹。之以人爲食也。故罪深惡極。自作之孽。難遣活也。先是分封四部。衆建宰桑。四圖什墨。廿一昂吉。蓋欲繼絕舉廢。以休以息也。而何煽活不已。焦爛爲期。終于淪亡。胥盡伊犁。延袤萬里。寂如無人之域也。是非我佳兵不戢。以殺爲

德也。有弗得已耳。西師之什。實紀其詳悉也。以其反覆無常。遲益久而害益深。則其叛亂之速。未嘗非因禍而致福也。是蓋天佑我皇清。究非人力也。伊犁既歸版章。久安善後之圖。要爲已定者。詎宜復失也。然屯種萬里之外。又未可謂計之得也。其潛移默運。惟上蒼鑒之。予惟奉時相機。今日之下。亦不敢料以逆也。是平定準噶爾後。勒銘伊犁之碑所由作也。」

格登山碑

綏定西北庫隴奎山北一百八十里格登山。清乾隆二十年。將軍班第等平伊犁。擊達瓦齊於此。刊立石碑。御製文曰。「格登之崔嵬。賊固其壘。我師堂堂。其固自摧。格登之巖巖。賊營其穴。我師洸洸。其營若綴。師行如流。度伊犁川。粵有前導。爲我具船。渡河八口。遂抵格登。面淖背岩。藉一昏冥。日擣厥虛。日殲厥旅。豈不易易。將韜我武。將韜我武。詎曰養寇。曰有後謀。大功近就。彼衆我臣。已有成辭。火炎崑岡。懼乖皇慈。三巴圖魯二十二卒。夜斫賊營。萬衆

股栗。人各一心。孰爲汝守。汝頑不靈。尙竄以走。汝竄以走。誰其納之。獻縛軍門。追悔其遲。於恆有言。曰殺寧宥。受俘赦之。光我擴度。漢置都護。唐拜將軍。費賂勞衆。弗服弗臣。旣臣斯恩。旣服斯義。勒銘格登。永詔億世。」

西方淨海

西方淨海在鄂勒追圖博木臺附近。亦曰賽里木淖爾。周二百里。渟瀦淵深。水色清碧。純潔無雜物。日起潮汐。不爽晷刻。東南隅有島。上有清潘效蘇建之龍王廟。崇峙其間。殊形壯麗。環海皆山。峯巒積雲不消。倒影入水。青白相映。景物勝絕。

塔勒奇山

塔勒奇山在綏定塔拉奇阿璊台。峯巒峭拔。林木暢茂。森陰蔽日。景物絕幽。多藥材。類爲珍品。有泉瀑。歎涌成溪。昔元太祖西征。鑿山通道。架木爲橋。共四十人。清乾隆時修葺之。至今猶有存者。全山岩石林泉。清秀奇妙。爲伊犁

第一名勝

博果園

博果園在惠遠城東門外。中有廳堂亭榭。泉石花木之屬。多果樹。尤多蒲萄。風物清佳。允堪遊覽。相傳建築是園者。爲清代某協領云。

四 阿克蘇

色伯臺山

色伯臺山在拜城縣東北。三峯聳起。如筆架狀。中峯最高。左峯次之。右峯最低。林木森立。枝柯蒼翠。遠望蔚然。山南一泉澄碧。可勺而飲。

溫泉

溫泉在溫宿城外。瀦於方池。池上欄以圍之。覆以亭榭。可以休憩。水清澄而冷。固非溫泉也。或曰縣名溫。故以溫名之。泉源來自山崖。湍湍而下。崖間舊有清張曜建之龍王廟。當時崇樓三層。號稱宏麗。今已傾壞。止一層矣。

五 焉耆

玲瓏窩

鄯善車轆泉地方。兩山崇峙。其南石窩。如佛龕。如蜂巢。如鴿籠。如土室。巨細深淺。廣狹高低。且隱有種種形狀。肖類禽獸。幽曲靈妙。乃邊陲之異觀也。人稱之爲玲瓏窩。

羅布泊

羅布泊在婁羌縣東。卽羅布淖爾。漢曰蒲昌海。一名輔日海。又曰牢蘭海。亦曰勃澤。又稱鹽澤。湖面高出海面二千二百尺。東西長二百里。南北廣百餘里。爲天山以南崑崙以北之溢池。其水冬夏無增減。味鹹。產鯉魚水獺之屬。渟瀦浩瀚。爲省中大泊。相傳此水潛流伏行。爲黃河之暗源。

蘇剛塔

蘇剛塔在吐魯番縣東。魯克沁回王蘇剛建。故名。堆砌之法。殊爲精巧。因甚

美觀高三十餘尺。其旁有回寺。

且末故城

且末縣城南十五里有古城。周二十里。乃且末故都城也。旁有一塔。中立骸骨一副。相傳出於砂中者。

飲馬河

飲馬河在尉犁縣城南。源出博斯騰泊。世傳漢班超西征。飲馬於此。故名。後有孔雀棲於上。因又名孔雀河。

六 喀什噶爾

葉爾羌碑

華爾羌碑在莎車。(卽華爾羌)清乾隆二十四年平回部。葉爾羌之舊伯克回民等。以全城降。因勒御製平定回部勒銘。葉爾羌碑文於城中。文曰：「粵稽回始。肇自天方。又名默克。一號天堂。大食見元。回鶻見唐。是皆彷彿。所

傳勿詳。惟皇清撫有華夏。血氣之倫。均歸陶冶。準夷昔強。冥頑弗下。恃厥險遠。實梗化者。貌兪其衆。豺狼其羣。以回爲羊。役以耕耘。利其善賈。三倍市欣。拘二酋長。處伊犁濱。四大回城。輸租獻賦。驢格是供。衛拉是懇。繭絲奚堪。溝壑已遽。有面內心。其何能訴。準夷旣平。羣回見天。謂自今始。飽食宴眠。遺厥酋歸。撫爾土田。生死骨肉。詎疑變遷。詎疑變遷。德竟怨報。助我叛疆。戕我星軺。是用興師。聲罪致討。乃致抗顏。蟾蜍譟讎。旣侮厥外。宜安厥內。而何狂狙心焉。昏憤殺人爲戲。奪妻爲穢。大失衆心。無不怨背。三道並發。四甄齊攻。酉知勿支。自擄一空。廿日之前。駭走無踪。爾雖無踪。我追應窮。滔滔洸洸。連戰皆克。旦夕苟延。遂入異域。異域畏懷。舉旗助力。高鼠莫逋。遂來獻馘。二首旣殲。諸回永靖。設官定賦。去其苛政。昔之諸回。曉戰夜偵。今恬以嬉。各保性命。昔之諸回。爲準夷臣。今語隣封。曰天王民。曰天王民。誰汝苦辛。藝爾黍稷。孳爾子孫。在昔己巳。爰平金川。茲定回部。亦己卯年。歲符理紀。瑞疊祥駢。持盈

保奏。惟懋慎旃。」

伊西沮庫爾淖爾碑

莎車西有伊西沮庫淖爾。水勢深廣。羣山環繞。北通安集延。西至烏什。南抵拔達克山。清乾隆時。副將軍富德窮追回酋至此。回酋奔拔達克山。遣使索俘。二酋旋授首於淖爾之上。帝因作文勒碑以紀功。曰：機有若失而反得。智者之所勲。而愚者之所惑也。事有若勞而終逸。勇者之所劬。而懦者之所怯也。若夫安全回殲。二酋戰無不克。攻無不取。皆二將軍及諸參贊。以及行間衆將士之力也。然予亦有所深慰於其間者。則以五年劓口。霄旰運籌。口至實未敢偷安於頃刻也。幸我武保定。庶因答乾貺。慰先志。以免浮議之指斥也。伊西沮庫爾淖爾者。我副將軍富順等窮追二酋。至拔達克山之界。獲其降者萬人。二酋僅以身免。而遣使索俘。遂得獻馘。振旅以成萬勲也。其他倚山臨水。單騎可容。而我突將無前。四甄並發。如入無人之域也。賊衆首尾不

能相顧。豎我回纆。以招之降者。鋪厓以來。霍集占持刃止之。或且反戈倒戟也。是以二酋見事不成。拔身遠跳。銳突而喙息也。先是蹙之於霍斯庫魯克。襲之於阿爾楚爾。無不以少勝衆。批亢擣堅。桓桓之事。真如驅虎豹而逐狸兔。纏頭碩鼻者。流皆悵悵。跟跟見即辟易也。是以先聲異域。駭其跳盪。遮逆助順。用攬重緇而獻凶級也。我兵未深入。拔達克山境者。則以討逆之師。不蹂無罪之地。姑遣使焉。彼或曉順逆。亦將擒獻。是以將帥之臣。審機度時。我武少輯也。卒歲事而告成功。亦未爲計之失也。回部始末。已見於勒銘葉爾奇木之碑。辭不複綴也。時紀者定之在茲。是以按年月而刻石也。」

二澇壩

二澇壩在疏附東門外。碧水一泓。環以老樹。游魚分明可數。柯枝倒影其中。又有一二果園。雜置左右。風景清勝。爲邑之冠。

禮拜寺

禮拜寺在疏附北門內。崇閣壯偉。可容千人。庭前有廣場。古樹聳峙。濃陰蔽日。縱在炎夏。不知有暑。

奎星閣

奎星閣在疏附城東北隅土阜上。崇樓兩層。下層中祀文昌帝君。左祀劉猛將軍。右祀耿恭。班超。上層祀奎星。在此眺望。則城市廬舍。莫不盡收入眼。遊踪至此。誠足擴胸懷也。

耿公井

耿公井在奎星閣下。凡二。各方十尺。井水自底涌出。粒粒如跳珠。潄列可飲。居民爭汲之。相傳東漢耿恭軍行至此。苦渴無水。禱之而此泉涌出。因名耿公井。

香妃墓

香妃墓在疏附東門外。外圍以垣。墓冢上圓下方。殊爲宏壯。有廟曰香娘娘。

廟。回纏婦女常來此祈禱。輒有靈云。壁右有禮拜場。建築亦極偉麗。香妃墓爲新省有名之古蹟。蒞疏附者莫不遊焉。

七 阿山

哈朗提斯山

哈朗提斯山在承化縣西南。峯巒湧峙。形勢盤礴。北一山曰烏達布山。西一山曰遜隆底山。峯低如蹲。狀如二童。俯首於大人之旁。岩岫幽奧。瘦木扶疏。及秋則霜雪籠罩。一然皚白。敗幹膾蘖。景物荒涼。邊徼極塞。固不與關內同也。

將軍山

將軍山在承化縣東。崇峯屹立。勢甚峻拔。其上平坦。頗多泉流。俗傳元代西征屯兵十萬於此。

中華名勝古蹟終

中華名勝古蹟續編目錄

第二十四編 熱河

一 熱河

一—三八

五指山 敵樓山 珍珠厓 朝陽洞 湯山溫泉 廣仁嶺 避暑山莊 戒得堂
靜寄山房 煙雨樓 綠雲樓 創得齋 觀瀑亭 食蔗居 敞晴齋 秀起堂
靜舍太古山房 有真意軒 含青齋 玉岑精舍 文園獅子林 文津閣 宜
照齋 山近軒 獅子園 承德行宮 永祐寺 旃檀林 鷺雲寺 珠源寺 廣
元宮 溥仁寺 普寧寺 安遠廟 普陀宗乘廟 殊像寺 羅漢堂 須彌福壽
廟 星龕巖 灤平行穹覽寺 猴峰積雪 霍爾霍克嶺 石井 苔山 喇嘛山
雲光洞 白雲洞 石洞溝泉 豐寧行宮 金黃山 月華山 長壽山 石碑
槐樹洞 千佛洞 臥佛寺 柏山 鳳凰山 喀卜齊爾東山 玉瀑 大寧故城

中華名勝古蹟 第二十四編 目錄

遮蓋山 慶州故城 精園場

中華名勝古蹟續編

第二十四編 熱河

一 熱河

五指山

五指山在承德縣東南四十五里。五峯嶙峋。岩如仙掌。土人稱爲鷄冠山。上有古靈峯禪寺碑石。元至元二十四年僧居實撰。

敵樓山

敵樓山在承德縣東南一百六十里白馬川之源。一名觀音山。峯岡盤聳。亦足遊觀。上有元至元二十六年僧顯月撰之天宮禪院碑。

珍珠厓

珍珠厓在承德縣東南一百三十里。一名滴水厓。灤河流經其下。山勢盤旋。

數十里。松柏叢鬱。積翠成屏。臨河石壁峭立。山腰有洞。流泉琮琤。若珠璣迸落。然故名。

朝陽洞

朝陽洞在承德縣三十七里。石竇嵌空。橫貫山腹。深二十餘丈。廣二丈餘。其東高盈丈。西半之。曉日初生。光射石隙。隔山可見朝陽。義蓋取此。洞內外舊有小佛寺各一。

湯山溫泉

湯山溫泉在承德縣東北八十里。泉涌自山半。溫度適宜。可以沐浴。水東南流。會賽音河。清聖祖嘗敕建龍尊王佛廟於山。有御製碑記。

廣仁嶺

廣仁嶺在承德縣西十一里。卽古墨斗嶺。嶺之西南爲灤平縣界。自灤平至熱河爲清帝輦路。康熙五十七年發帑開始。工畢名曰廣仁。勒銘山上。建萬

壽亭。乾隆二十八年。又建碑亭一。刻御製雨中乘輿過廣仁嶺詩。

避暑山莊

避暑山莊在承德縣東北。本遼代離宮。康熙四十二年。修建爲清帝時巡覲見外藩之所。每年秋獮之前。輒駐蹕於此。志云。俯武列之水。挹磬鍾之峯。疊石繚垣。上加雉堞。如紫禁城之制。周十六里。南爲三門。中麗正門。東德匯門。西碧峯門。其東及東北西北門各一。東門外長隄蜿蜒。北起獅子溝。南盡沙隄背。延袤十二里。磬石七層。廣約丈許。宮左湖。右山。山勢自北而西。曰梨樹峪。曰松林峪。曰榛子峪。曰西峪。迴抱如環。湖水自東北演迤而南。至萬樹園之陽。淨練澄空。沙隄曲徑。如意洲在焉。其北爲千林島。瀑源來自西峪。垂於湧翠巖之嶺。匯注湖中。湖岸曲榭長橋。引而東南。至德匯門之左。爲出水牖。以時蓄洩。敞殿飛樓。平臺奠室。因地形。任天趣。不崇華飾。妙極自然。聖祖題三十六景。各書遍額。並繪圖賦詩。一曰。煙波致爽。澹泊敬誠殿後第三重。

爲殿七楹。宏敞高明。旁挹雲嵐。後帶湖渚。爲三十六景之冠。二曰芝徑雲隄。由萬壑松風之前北行。長隄蜿蜒。徑分三洲。若芝英雲朵。隄左右皆湖。中架木爲橋。南北樹寶坊。湖波鏡影。勝趣天成。三曰無暑清涼。芝徑雲隄之東北。洲曰如意。建殿三重。第一重面南爲門。五楹。四面皆水。門當其前。湖風徐度。入天勝景。四曰延薰山館。如意洲正殿七楹。左右配殿各五楹。在無暑清涼內。第二重南向。楹宇敦樸。楹風時來。五曰水芳巖秀。延薰山館後殿十五楹。在如意洲最深處。鏡波繞岸。瑤石依欄。聖祖嘗以幾暇讀書其中。六曰萬壑松風。前殿據岡皆湖。漸近湖爲陂陲。五楹北向。長松數百樹。掩映周迴。笙鏞迭奏。高宗題曰紀恩堂。有避暑山莊紀恩堂記。殿後三楹。曰鑑始齋。坡下亭曰晴碧亭。七曰松鶴清越。莊內西偏爲榛子峪。殿五楹南向。青蓋垂陰。九皋振響。後殿曰靜餘軒。八曰雲山勝地。煙波致爽之後。高樓北向。俯瞰羣峯。雲嵐秀蔚。樓之西楹奉佛像。高宗題曰蓮花室。九曰四面雲

山。莊西北隅最高處。構亭其上。凌霄切漢。羣山拱揖。各開生面。數百里外。如列屏嶂。十曰北枕雙峯。莊內直北山頂。有亭翼然。西北金山。東北黑山。排空屹向。如天門雙闕。對拱檐楹。亭前兩石筍。秀削青瑤。鐫聖祖詩及高宗和章於其上。十一曰西嶺晨霞。自雲帆月舫右行。傑閣巋然。臨波面岫。紫霞晨映。錦章繡錯。在雲岑木杪之間。十二曰錘峯落照。莊東五里爲磬錘峯。就山莊西嶺構亭。與四面雲山亭相望。紅輪西照。峯迴出孤標。揚暉天際。彩霞萬道。十三曰南山積雪。一亭在山莊正北。高據山巔。塞地高寒。秋杪雪下。南望諸峯。皎然寒玉。十四曰梨花伴月。山莊之西北曰梨雲峪。入峪平岡透迤。幽澗潺鳴。當春時梨花萬樹。艷挹清輝。爲壺天勝境。十五曰曲水荷香。北山麓有亭南向。下映曲沼。芙蕖萬柄。翠蓋紅葩。翛然香遠。十六曰風泉清聽。松鶴清越之西。置三楹。有泉出兩山間。琤淙穿注。風來澗響。與鶴韻松聲相應。答內爲秋澂齋。十七曰濠濮間想。澄湖之北。構亭在如意。

洲上。水木明瑟。魚鳥因依。十八曰。天宇咸暢。湖之東岸。有阜巍然。上構殿宇三楹。積翠中天。層霄紫漢。皆歸一覽。十九曰。暖漏暄波。熱河以水得名。山莊東北隅有牖。湯泉餘潤。自宮牆外。演迤流入。建閣其上。漱玉跳波。靈潤蒸蔚。二十曰。泉源石壁。一水懸厓直下。旁無路蹊。飛流百丈。從石壁瀉出。磨厓鑄聖祖御書。西爲半月湖。更西有亭曰。矚朝霞。二十一曰。青楓綠嶼。越泉源石壁而北。跨巔面南。置三楹。錦樹分叢。丹霞競彩。其中殿五楹。曰風泉。滿清聽。門外三楹。面西曰霞標。東響四楹。高宗書額。曰吟紅樹。二十二曰。鶯囀喬本。有亭當萬樹園之陽。近俯清波。遠連叢樾。和風澹蕩。時鳥嚶鳴。見萬物得所之樂。二十三曰。香遠益清。萬樹園東南。金山之陰。前殿五楹。下臨曲沿。涼軒明淨。綠房紫葩。芬菲襲人。後三楹曰紫浮軒。西八楹曰依綠齋。齋左有亭曰含澄景。乃高宗所題也。二十四曰。金蓮暎日。延薰山館之右。有殿五楹。西嚮。環峙金蓮花。亞葉交枝。含風浥露。晨景初出。金彩鮮新。旁

室三楹。曰川岩明秀。二十五曰遠近泉聲。緣長隄而北。石路半里許。漸聞水聲。攬金戛玉。水樂琅然。殿三楹。南嚮。其東曰聚香齋。殿後爲亭。曰聽瀑。外三楹。南嚮。曰招涼榭。二十六曰雲帆月舫。仿舟形作室。上爲樓。北嚮。在如意洲。延薰山館之西。二十七曰芳渚臨流。由萬壑松風西行。折而北。傍湖一曲。有亭南嚮。巨石嵌空。清流倒影。夾岸嘉木灌叢。芳草如織。二十八曰雲容水態。梨樹峪之東。山麓砥平。殿五楹。東嚮。橫峯側嶺。獻秀爭奇。縹白縈青。波光無際。其西向樓三楹。曰曠觀。二十九曰澄泉繞石。入梨樹峪。一徑青蒼。泉自石竇流出。依山曲折。有亭北嚮。倚層巘。鏡清漪。雲根綠淨。響若璆琳。三十曰澄波疊翠。有亭凡三楹。北向。在如意洲之陰。湖光一碧。遠極天際。其北翠壁千尋。浮光掩映。風景幽絕。三十一曰石磯觀魚。由遠近泉聲而下。清溪一曲。有石磯平廣。作亭其下。東嚮。俯視澄波。潛鱗涵泳。一一可數。三十二曰鏡水雲岑。天宇咸暢。閣下有殿五楹。西嚮。倚山構宇。水周三面。

曲廓外布。迴抱如半月。檻陰架亭。額曰金山。下有亭曰芳洲。三十三曰雙湖夾鏡。水自東北入南。匯山泉。瀦爲大湖。隄橋左右。分一湖爲二。跨橋寶坊二。其北額曰雙湖夾鏡。三十四曰長虹飲練。在長橋南岸。與雙湖夾鏡坊對峙。兩岸煙瀾渺瀾。彌望如一。三十五曰甫田叢樾。湖北岸最東一亭。與萬樹園相近。平原茂木。奧如薜如。爲聖祖閱習步圍之地。三十六曰水流雲在。湖北岸最西一亭。漸近長隄。湖水澄虛。空明上下。悠然與造化同符。三十六景。以茲爲殿。乾隆十九年。高宗駐蹕山莊。於前所題三十六景外。再題三十六景。標題皆以三言。有卽聖祖題額者。有爲高宗新題者。一曰麗正門。山莊正南一門。崇宏廣大。門左爲朝房。內懸聖祖避暑山莊題額。每秋巡之期。臣工啟事。外藩覲見。皆由于此。二曰勤政殿。麗正門之左。南嚮殿二重。前三楹曰勤政殿。內面南。額曰正大光明。面北。額曰高明博厚。後殿前簷額曰卷阿勝境。後簷面北。額曰雲牖松扉。殿前樓五楹。長廊周匝。凡慶賚燕

饗之典。於斯御焉。三曰松鶴齋。澹泊敬誠殿之東。構大殿七楹。岫列喬松。庭翔雪羽。循聖祖松鶴清越之義。題曰松鶴齋。四曰如意湖。作亭於湖曲。東嚮。前臨如意洲。芷岸蔭林。苔階漱水。洲勢逶迤。如芝英之半偃。亭之西爲芳園。居五曰青雀舫。山莊勝趣。實在一水。濺瀑淙泉。咸匯湖中。有御舟。題曰青雀舫。泛月衝雨。漾碧搖青。靈境畢獻。舟有隴在臨芳墅旁。六曰綺望樓。碧峯門之左。倚城爲樓。凡七楹。北嚮。登樓極望。水木雲巒。組分繡錯。後樓三楹。南嚮。懸聖祖額曰坦坦蕩蕩。七曰馴鹿坡。塞山產鹿。孽息蕃衍。而山莊所畜爲特馴。山逕逶迤。儻俟成羣。樂依文囿。有御書三字勒於石。八曰水心榭。石渠跨水。南北坊各一。中爲榭三楹。飛桷高竦。虛檐洞朗。上下天光。影落空際。逾石梁而北。有亭名曰物魚。九曰頤志堂。清舒山館之西。數楹南嚮。懸額曰頤志堂。又曰光風齋。月其西有殿。東嚮。曰學古堂。均爲餘幾典學之所。十曰暢遠臺。清舒山館之左。因周垣舊基。互爲長廊。下依綠水。有

臺巍然。登臨縱覽。萬象森羅。十一曰靜好堂。在清遠山館之後。筠篁叢碧。巘岫縈青。堂外飛樓。疏櫺四啟。曰澄霽樓。樓下堂室。區分曰風泉滿清聽。曰山水含清輝。曰高山流水。曰岫幌。十二曰冷香亭。靜寄山房之側。有亭臨水。東嚮。山莊荷花。秋深未落。與晚菊寒梅同韻。亭北三楹。曰峽琴軒。與亭鱗次。十三曰採菱渡。湖之南。有小舟可登。構亭其澹。形如一笠。新菱出水。帶露縈煙。亭後殿三楹。曰環碧。十四曰觀蓮所。延薰山館西南。崇亭傍水。南嚮。芙蕖萬柄。涵光照影。天葩瓊蕊。洵爲甲觀。十五曰清輝亭。如意洲東。臨水一亭。垂楊披岸。亭角出柳陰中。有清曠絕塵之趣。十六曰般若相。清輝亭西。精舍一區。南嚮。中奉佛像。額曰法林寺。內殿三楹。額曰般若相。十七曰滄浪嶼。嶼不滿十弓。而峭壁直下。有千仞之勢。中爲小池。石髮冒池。如綠雲浮空。有室三楹。後檐北嚮。懸有聖祖書額。十八曰一片雲。由延薰山館再折而東。面山殿八楹。雲陰乍起。紛郁輪囷。極靜深之趣。十九曰蘋香洗。

萬樹園之東南。湖水分流。一鑑澄澈。中多青蘋。豐茸淺蔚。清香襲人。水濱三楹。南嚮。二十曰萬樹園。北倚山。南臨湖。其中平原數千畝。嘉木羅植。嘗錫宴觀燈於此。二十一曰試馬埭。萬樹園西南。草柔地曠。馳道如弦。雲錦成羣。騰驥沛艾。有御書碣曰試馬埭。二十二曰嘉樹軒。萬樹園東。爲軒。凡三楹。南嚮。老樹輪囷。重蔭數十畝。長榮永鬯。皆百年前物。二十三曰樂成閣。嘉樹軒之上。重閣五楹。一重曰開襟霄漢。再重曰樂成閣。塞田遠近。崇墉比櫺。童叟慶舞。遙觀厥成。二十四曰宿雲簷。宮城東北隅。山盡處。當惠廸吉門。因勢高敞。構平臺以攬勝。雲氣往來。若宿檐際。二十五曰澄觀齋。宮城東北。殿五楹。西嚮。曰惠廸吉。聖祖書其前。簷額曰澄觀齋。前匯山莊諸水。綠波翠影。遠近交映。二十六曰翠雲岩。澄觀齋之後。有亭翼然。晨靄暮霞。絢紫緋青。巖巒交複。雲氣特多。聖祖書額曰翠雲岩。亭後摩崖勒聖祖書大字曰雲岩。二十七曰罨畫窗。自清風綠嶼折而東。曲室窈深。疎櫺洞啟。冬嶺

林泉。咸在几席。儼如罨畫。二十八曰凌太虛。北山之巔置亭。拔地倚天。顯氣清英。飄飄有凌雲之致。下爲殿五楹。曰清溪遠流。東三楹爲含粹齋。二十九曰千尺雪。玉雪軒之東數十武。有瀑泉懸流噴薄。構殿五楹。額曰千尺雪。瀑源來自雲根。捲沫跳波。寒光四射。清景獨絕。三十曰寧靜齋。千尺雪之後。依山構齋。倚山帶溪。題額曰寧靜。後樓懸聖祖書額曰清敞。三十一曰玉琴軒。與寧靜齋並峙。當衆流激湍間。觸石琮琤。清越相應。三十二曰臨芳墅。水流雲在亭之隔岸。西折而南。臨芳墅在焉。爲殿五楹。曲渚迴汀。藥欄荷沿。芬郁左右。三十三曰知魚磯。臨芳墅前殿五楹。面南。踞湖之北。與采菱渡相對。羣魚出游。爲潛爲躍。並呈天趣。三十四曰湧翠岩。有瀑自巖而下。巖間構殿三楹。東嚮。晨曦朝爽。空翠四合。殿後有佛廬。有樓三楹。額曰自在天。三十五曰素尙齋。梨峪中構殿五楹。面南。地在山巔。因得高勢。軒宇曠然。結構渾樸。不施雕績。三十六曰永恬居。素尙齋之前殿。面南。水木

澄明。煙巒靜妙。景物恬和。如遊瓊島。據以上所述。則山莊爲景七十二。規模宏偉。風物清幽。洵玉塞之神皋。金庭之奧區也。然皇權旣革。年代又遙。比之當年。已覺稍稍陵替矣。

戒得堂

戒得堂在清舒山館東。五楹南向。額曰戒得堂。有御製戒得堂記。堂之後廡曰鏡香亭。堂北層樓特起。曰問月樓。樓之東爲羣玉亭。其南有軒。曰含古自軒。而南爲來薰書屋。又南爲佳蔭室。室外有齋三楹。俯臨流水。曰面水齋。

靜寄山房

靜寄山房在山莊內。環澄湖。踞平阜。穆然淵靜。宛在水中。又內爲瑩心堂。額曰閒止。又內爲湖山罨畫門。南嚮。榜曰月色江聲。

煙雨樓

煙雨樓仿嘉禾煙雨樓式構造。故名。在如意洲之北。舊名青蓮島。樓五楹。四

面臨水。一碧無際。上跨小橋。以通往來。背側古木青蒼。濃陰掩蓋。風物勝絕。樓外構屋三楹。曰青楊書屋。溪旁構齋。曰對山齋。山頂有亭。曰翼然亭。

綠雲樓

越湧翠岩有樓聳峙而起者。乃綠雲樓也。地當西峪。爲瀑源所自出。疊嶂層雲。滂然四合。憑欄瞻眺。景物萬狀。旁三楹。曰木映花承。又前三楹。曰水月精舍。

創得齋

創得齋在西峪最深處。踞山爲屋三楹。曰創得齋。其後右偏爲樓三楹。曰夕佳樓。前小樓二楹。曰桃碧室。內榜曰一塵不染。境地幽邃。如在世外。

觀瀑亭

山莊厓館雲阿。深林穹谷。咸以瀑流增勝。乳竇穿空。雲根吐溜。構亭山麓。御題額曰觀瀑。半山一亭。御書瀑源二字。由是再陟而上。爲笠雲亭。

食蔗居

由觀瀑而窮其源。緣山取逕。繚繞數折。有屋三楹。爲食蔗居。松林峪之勝境也。徑既幽迴。地復高敞。奧如曠如。轉深轉妙。在二楹。額曰小許菴。右有亭曰倚翠亭。東北山亭曰松岩。

敞晴齋

敞晴齋在山莊西北隅。緣岡冠嶺。構堂其上。秋高氣朗。蒼碧千里。門外有橋。奇石森列。左曰青綺書屋。右曰繪韻樓。

秀起堂

西峪中峯特起。別岫層巒。奔趨拱極。據峯爲堂。備攬諸勝。登臨振衣。如在天半。其下曰經畬書屋。東北曰振藻樓。堂後山如屏障。高處一亭曰眺遠亭。

靜含太古山房

鷺雲寺之側。萬嶂環列。築山房一區。額曰靜含太古。邃谷穹林。纖塵不到。由

西廊而出。曰不遮山樓。向南得小亭。額曰趣亭。

有真意軒

自西峪至秀起堂。山逕縈迴。架屋數楹。御題曰有真意軒。軒外林巒高下。一草一木。曲呈真趣。軒曰空翠書樓。右曰小有佳處。後有亭。額曰對畫亭。

舍青齋

舍青齋。架岩爲屋。疊石成階。與敞晴齋隔溪相望。有額曰舍青齋。內面北。額曰清暉娛人。左曰挹秀書屋。右曰松霞室。

玉岑精舍

山莊西北溯澗流而上。至山麓攢峯竦岫。如縣圃積玉。精舍三楹。額曰玉岑。室右偏曰貯雲簷。穿雲陟逕。有亭二。曰湧玉。曰積翠。依山梁構室。曰小滄浪。

文園獅子林

清舒山館之前。度地爲園。模山範水。蘊淑懷奇。因倪瓚獅子林圖之式。備十

有六景之勝。御題曰文園獅子林。清高宗有十六景詩。其目曰獅子林、曰虹橋、曰假山、曰納景堂、曰清闕閣、曰藤架、曰磴道、曰占峯亭、曰清淑齋、曰小香幢、曰探真書屋、曰延景樓、曰畫舫、曰雲林石室、曰橫碧軒、曰水門。

文津閣

千尺雪之後。卜高明塏爽之處。用浙江范氏天一閣之式。建爲高閣。以藏四庫全書。御題曰文津閣。與文淵、文源、文溯三者。稱天下四閣。閣前爲趣亭。東爲月臺。西則西山層巘屏列。景物幽秀。

宜照齋

宜照齋在山莊西北門內。倚石城構齋五楹。臨風致爽。晴照宜人。左爲屬霄樓。右爲却炎榭。由榭而東。爲就松室。其後爲積嘉亭。

山近軒

山近軒在山莊西北。峯巒窈窕。環抱檐楹。當萬山深處。宮門三楹。南向正殿。

五楹。殿西三楹。額曰清娛室。東五楹。曰養粹堂。堂之南爲延山樓。西向敞亭三楹。奇石嵌空。迴廊曲注。額曰簇奇廊。東峯之頂。草亭一區。有松蒼然。額曰古松書屋。

獅子園

獅子園在承德獅子嶺。故名。清世宗在藩邸。扈從。賜居於此。東西宮門五楹。其南碧水迴環。北岸亭三楹。額曰翠柏蒼松。逾橋而南。懸聖祖賜額。前五楹。額曰芳蘭砌。曰樂山書屋。書屋東環以迴廊。中峙方亭。又東南殿三楹。額曰水情月意。後殿三楹。東有亭。額曰環翠。北有待月亭。在殿東南。前殿五楹。後殿三楹。東五楹。額曰片雲舒卷。又東北三楹。額曰護雲莊。西北七楹。額曰羣山環翠。東北爲草房。又東北殿五楹。額曰徵懷。更內五楹。曰松柏室。後三楹。爲忘言館。其西跨澗爲小堂三楹。曰秋水。澗西南爲妙高堂。懸聖祖題額。堂五楹。踞山峯最高處。其南爲法林寺。額曰普門隨現。世宗高宗皆有詩題咏。

承德行宮

承德行宮有四。一曰釣魚臺行宮。在縣治北山莊東北十三里。清乾隆七年建。自熱河啟蹕。至木蘭中關爲首程。釣魚臺黃土坎爲止頓。宮門南向。殿東向。土人舊呼雙黃寺。地當熱河上流。三源既會。中產嘉魚。故名釣魚臺。一曰黃土坎行宮。在釣魚臺北十七里。清康熙五十六年建。南向。殿五楹。後殿九楹。左右各三重。宮之北有賽因河。會入固都爾呼河。一曰中關行宮。在黃土坎東北七十里。康熙五十一年建。南向。殿五楹。榜曰松間明月。後楹榜曰雲林蔚秀。東十餘里有峯嶄然。洞穴嵌空。錫名玲瓏峯。自宮中望之。縹緲雲際。稱爲勝境。一曰張三營行宮。在波羅河屯北六十二里。康熙四十二年建。北卽石片子秋獮東道。由波羅河屯駐蹕於此。額曰雲山寥廓。

永祐寺

永祐寺在避暑山莊內萬樹園旁。清乾隆十六年建。南向。聯額皆御書。門外

樹坊三門。額曰永祐寺。入門。前殿五楹。供彌勒佛。丹墀碑二。鑄御製碑文。左一通。前滿文。後蒙古文。右一通。前漢文。後西番文。後爲寶輪殿。五楹。供三世佛。八大菩薩。後殿五楹。供無量壽佛。各有殿樓。其東爲能仁殿。後殿之北爲舍利塔。一名六合塔。檐瓦塔頂。皆琢以石。凡九層。各有額。第一層東北壁。刻御製詩。塔後豐碑。屹立。面南。鑄御製舍利塔記。面北。鑄御製避暑山莊百韻詩并序。面塔殿三楹。上有樓。正中舊供聖祖御像。樓之東楹。則供世宗御像。樓西偏精藍三楹。曰寫心精舍。寺基在甫田叢越之東。左傍宮牆。後環雲水。樂成閣峙其東北。春好軒敞其東南。松牖雲扃。景物清勝。有御製永祐寺碑文紀其詳。又山莊碧峯門之左。有碧峯寺。東向前。爲天王殿。內爲正殿。更內爲經樓。寺後有精藍。曰味甘書屋。其右偏爲叢碧樓。前爲池。作亭臨之。曰迴溪亭。

旃檀林

旃檀林在山莊內西北隅。殿三楹。南向。喬林彌望。若葩洞卉。風過皆馨。其旁室曰天籟書屋。岩頂天池。淳涵湛澈。有軒曰澹軒。堂坳一池。有亭曰滄洲。趣一樓在松蟠雲蔚間。曰松雲樓。其東爲澄霽樓。更東爲超然亭。境路幽夔。上有樓曰雲潤樓。附近有水月庵。門外石坊一。門額嵌石爲水月庵。內殿三楹。供水月大士相。菴當西嶺深處。山之半曰山心精舍。由精舍後達西嶺。山巔一亭如笠。登陟極高。爲放鶴亭。

鷲雲寺

鷲雲寺在西嶺秀起堂之側。東嚮。內正殿三楹。殿後堂樓三層。雕甍插漢。寶鋒韻風。俯視羣山。若蓮臺層湧。光景絕勝。

珠源寺

珠源寺在水月精舍西南。東向。門外石橋跨水。前有石坊。門內三楹。前爲天王殿。中爲佛閣。後殿爲大須彌山。供一切諸佛。最後殿樓十三楹。曰衆香樓。

崇宏壯麗。矗立其間。寺據瀑源來處。故曰珠源。

廣元宮

廣元宮在山莊內西北隅之山頂。乾隆四十三年勅建。廟制仿泰山元君廟。故又名元君廟。南向。東西山門各三楹。內爲仁育門。更南爲香亭。曰馨德亭。東西配殿各三楹。東曰邀山室。西曰蘊奇齋。正殿五楹。曰仁育殿。山門外有亭一。曰古俱亭。宮外衆木圍繞。樓閣隱現於林杪柯葉間。俯旨下瞰。景物壯秀。

溥仁寺

溥仁寺在承德縣東北熱河行宮東三里許。康熙五十二年。聖祖六十萬壽。蒙古諸藩建以祝釐。寺南向。門額曰溥仁寺。兼漢滿蒙古文。門內天王殿三楹。又內殿七楹。供三世佛。殿廡立碑二。鐫聖祖御製碑文。左滿文。右漢文。碑陰及左方。又鐫御製詩。又內殿九楹。供無量壽佛像。聯額皆御書。有聖祖撰

碑文。寺後林木翳翳。遠望深鬱。崇樓數層。巍然聳峙。宏偉壯麗。最堪遊觀。又寺後有溥善寺。亦聖祖六十萬壽。蒙古諸藩建以祝釐。規製與溥仁寺同。

普寧寺

普寧寺在熱河行宮東北五里獅子溝。乾隆二十年平定準噶爾。聖祖幸避暑山莊。四衛拉特部落來覲。錫宴封賚。勅建普甯寺。以昭武成。仿西藏三摩耶廟制。因一名布達拉廟。廟制崇宏壯偉。構造形式。異於尋常。門外樹坊三。門內正中有碑亭。植碑二。鐫御製碑文。左右爲鐘鼓樓。中天王殿五楹。又內正殿七楹。殿後爲大乘閣。月臺左右。五色浮圖四。閣三層。各七楹。閣東精舍五楹。曰妙巖室。寺有御製碑文。紀其始末。距此一里。有普佑寺。乾隆二十五年勅建。寺高嚮門三。內爲正殿。又內爲天王殿。後爲法輪殿。最後爲經樓。寺中諸佛。皆仿西藏樣像。又行宮東北二里許。有普樂寺。乾隆三十一年勅建。寺東嚮。正殿供藥王佛。門前植碑一。鐫御製文。

安遠廟

安遠廟在承德東北行宮東北山麓。乾隆二十四年。以準噶爾降人達什達瓦部遷居山下。二十九年勅建此廟。仿伊犁固爾札廟式。西南向。繚垣正。四面各有門。中爲普度殿。三楹。週以迴廊。六十有四楹。所謂都綱也。迴廊前立石。鐫御製詩。具漢滿蒙古唐古忒四體書。殿壁週繪佛圖源流。各識佛號于其旁。亦四體書。殿最上層藏御用甲仗。昔時每歲藩部入覲。咸集廟下。

普陀宗乘廟

普陀宗乘廟在承德東北行宮里許。乾隆三十五年。仿西藏達賴都綱法式創建。御書額曰普陀宗乘之廟。東西二門。普殿八楹。又十六楹。額曰千佛之閣。中殿二十楹。又十八楹。後殿二十五楹。後爲經樓。聯額皆御書。有御製碑文。

殊像寺

殊像寺在普陀宗乘廟之西。乾隆三十九年敕建。仿五台山殊像寺式。故名。寺南向。門三楹。左右有鐘鼓樓。內爲天王殿。又內爲會乘殿。七楹。後爲寶香閣。內爲樓十八楹。曰清涼樓。寺旁築室三楹。曰香林室。又樓三楹。曰倚雲樓。有御製詩。

羅漢堂

羅漢堂在承德縣東北。乾隆三十九年建。殿額皆御書。堂中應真像。仿浙江海寧安國制。共五百餘尊。堂門恆上鎖。入內遊覽。須納錢。

須彌福壽廟

須彌福壽廟在承德縣北。乾隆四十五年。高宗七十萬壽。西藏班禪額爾德尼祝釐遠至。因敕建札什倫布廟。唐古忒語。札什謂福壽。倫布謂須彌山也。廟門南向。刻御書額曰須彌福壽之廟。廟額皆具四體書。規制宏壯。與普陀宗乘廟相埒。有御製須彌福壽廟碑記。及札什倫布之廟落成紀事詩。札什

倫布廟詩。

星龕巖

星龕巖在灤平縣西北五十三里。清聖祖題名。岩間鑄石佛像三。梵相奇古。有寺名星龕巖寺。康熙時敕建。

灤平行宮

灤平行宮有五。一曰喀喇河屯行宮。在縣治西。去避暑山莊西南三十五里。當山莊未修建時。康熙十六年聖祖巡行。駐蹕於此。嗣後歲以爲常。宮門南向五楹。額曰秀野軒。宮基中界灤河。依山帶水。有小金山之號。西上則灤陽別墅。有堂曰翠雲。亭曰虬蓋。水木清華。景物明瑟。外則萬家烟火。鱗次櫛比。熱河以南。此爲勝境。一曰王家營行宮。在縣治西。康熙三十四年建。榜曰引流成溪。凡四重。東西亦如之。其陽面山。地勢平曠。廊軒接比。院宇高明。一曰常山峪行宮。在縣治西南。去王家營四十里。康熙五十九年建。南向。殿五楹。

曰蔚藻堂。內曰青雲梯。西曰虛白軒。後曰如是室。蔚藻之右。曰翠風埭。曰綠
櫺徑。曰楓香坂。曰陵霞亭。皆剏建於聖祖。高宗標爲八景。一曰兩間房行宮。
在縣治西南。去常山峪三十三里。至古北口四十餘里。康熙四十一年建。南
向。殿五楹。額曰秀挹清芬。曰鏡風含月。後殿越小橋。當山東北隅。曰澄秋軒。
盤折而東。高出木杪。有亭曰暢遠。塞外山川。茲地首當形勝。自昔以兩間房
得名。今則廬舍繁盛。非同曩日矣。一曰巴克什營行宮。在縣治西南。至古北
口十里。康熙四十九年建。殿五楹。南向。後殿左右各二重。東西向。規制純樸。
南望邊牆。高出山上。潮河奔流入塞。田疇井里。熙熙豐樂。不覺在邊關之外。

穹覽寺

穹覽寺在喀喇河屯行宮東。南向。康熙四十三年。聖祖駐蹕行宮。隨侍人員
建此寺以祝壽。門內鐘鼓樓二。中植碑一。鐫聖祖御製文。前殿內爲後殿。東
西各有配殿。寺基爲陂陀小阜。門俯灤河。如練如帶。隔岸諸山。螺髻湧現。有

俯視層穹之概。去此里許。有殿宇相望者。曰琳霄觀。康熙四十九年建。南嚮。門外樹坊二。門內亦有鐘鼓樓。內爲靈官殿。又內爲聖母殿。又內爲火神殿。殿額皆御書。

猴峯積雪

平泉縣西五里有猴山。危峯孤峙。高出雲際。每當朔雪初晴之際。遙望皚皚。宛如積玉。土人稱爲猴峯積雪。

霍爾霍克嶺

霍爾霍克嶺在平泉縣喀喇沁右旗南一百二十里。有二洞。舊時爲僧所居。依洞架楹。構精舍於其側。戶牖旁通。隨山向背。其東則霍爾霍克河出焉。西則賽音河發源其麓。

石井

石井在平泉縣北二道營山。水極甘寒。可濯可飲。旁有小浮圖一。不知建自

何時。

苔山

苔山在幽寧縣東。有浮圖三級。高矗峯頂。東則有伊遜河。西則爲伊瑪圖河。蜿蜒如帶。夾流山下。登高眺望。風物亦佳。

喇嘛山

喇嘛山在豐寧縣北。山峯高峻。形勢嶮危。半山石洞。一仄徑緣沿盤紆而上。林壑幽勝。登巔眺望。則幃岫崇疊。樹木葱蘢。黃沙黑林。輝映陽光。景物至佳。

雲光洞

雲光洞在豐寧縣東黃姑屯南四十里。山勢阻深。其右有泉從石間出。東南流會入固都爾呼河。山麓有洞。康熙六十一年。就洞建寺。賜額曰雲寶珠光。因以雲光名洞。

白雲洞

白雲洞在豐寧縣西大閣兒東南七十五里。亦名朝陽洞。洞頂有雙瀑對懸。飛流樹杪。洞內有神像。鐫額曰寶華臺。不知何時書。舊外種山桃百餘株。春時霏紅掩映。尤增勝致。

石洞溝泉

石洞溝泉在豐寧縣西南一百里龍泉山。舊靈通寺之西南。爲潭三。高下相注。仄徑崎嶇。俯瞰深碧。每潭入水三尺。各有石門。晴霽水澄。了然可辨。潭水流出東南十餘里入潮河。

豐寧行宮

豐寧行宮有四。一曰什巴爾臺行宮。在縣治東南中關行宮北三十七里。清康熙五十九年建。自中關至波羅河屯。以什巴爾臺爲止頓。南向大殿五楹。後爲永懷堂。一曰波羅河屯行宮。在什巴爾臺北十八里。康熙四十二年建。殿南向。後依崇巘。前俯平林。有額曰山泉賞。曰檐際千峯。曰秋澄景清。一曰

濟爾哈朗圖行宮。在波羅河屯西北五十八里。昔清帝秋獮西道。由波羅河屯至濟爾哈朗圖。及阿穆呼朗圖。入伊瑪圖口。乾隆二十四年建。濟爾哈朗圖。蒙古語安樂所也。水泉甘美。庶草豐蕪。因以得名。一曰阿穆呼朗圖行宮。在濟爾哈朗圖北四十三里。乾隆二十七年建。當西入圍場之路。阿穆呼朗圖。蒙古語康寧也。

金黃山

金黃山在凌源縣東南三十五里。袤延七十里。山石礪礪。遠望作黃金色。山半有石洞。西南半里有泉涌出。冬夏不竭。

月華山

月華山在凌源縣東南一百八十里。有石竇東西相通。高一丈五尺。廣倍之。土人稱窟窿山。山有林泉寺。元建。清重修。有元大德中僧無際撰月華山林泉寺碑。稱大甯東南三舍餘。有山名月華。突然秀出面山之腹。有巖竇。號空

峒。知是山以洞稱勝。由來久矣。

長壽山石碑

凌源縣東北六十里。土城子西有長壽山。上有元雲峯真人康大真墓碑。又距山四百步許。有玉京觀舊址。有元至元二十四年李察撰。利州長壽山玉京觀地產碑。

槐樹洞

槐樹洞在朝陽縣南六十里。古槐山。一名朝陽洞。洞高二丈。廣五丈。石罅貫穿如蜂窩。中有石佛像。妙相儼然。

千佛洞

千佛在朝陽縣南八十里。石磴盤迴。繞山如束。躡級而登。洞在山半。口極廣大。入內數武。徑歧爲三。各循石隙。崎嶇而進。繚曲往復。最爲幽勝。其一洞深三丈餘。中有大小石佛。今所存僅數十尊。洞外斷碑。鐫大悲陀羅尼神咒。爲

遼統和二十三年造。距此二十里有五佛洞。中有石佛五尊。

臥佛寺

臥佛寺在朝陽縣西昂吉山。寺踞山巔。有遼應歷七年石幢。下又有天慶寺。亦遼時建。清時重修。寺有觀音石胎立像。高七尺。

柏山

柏山在朝陽縣土默特右旗東七十里。亦名烽臺山。山有十六峯。盤鬱四十餘里。山頂有遼安德州城廢基。斷井頽垣。猶可辨識。山半有遼靈巖寺舊址。有乾統八年耶律劭碑。

鳳凰山

鳳凰山在土默特右旗東南二十里。羣峯連互。周九十餘里。山椒一塔聳峙。諸峯抱之。如翠鳳昂首舒翼。故名。山有一洞。亦名朝陽。中有臥石佛像。又塔旁一小洞。有銅佛像。其北麓去朝陽洞二十里。山勢伏而復起。土人別名曰

麒麟山。其實一山也。山半向西有三洞。昔夜半嘗聞木魚聲。因名聞仙洞。卽古龍山也。崔鴻十六國春秋前燕錄云。慕容皝以柳城之北。龍山之西。福地也。卽此。

喀卜齊爾東山

喀卜齊爾東山。在建平縣東。有洞深三丈餘。洞外石筍矗立。狀態聳秀。有泉澄澈見底。清鑒毛髮。舊於上建龍神祠。

玉瀑

玉瀑在敖漢旗內。卽老河下流。石壁高聳。懸爲飛瀑。土人名爲響水。清乾隆八年高宗謁祖陵。經此。名曰玉瀑。有詩咏之。

大甯故城

大甯故城在老河之北。蒙古稱察罕蘇巴爾城。周二十里許。內有浮圖二。城外西南隅有浮圖一。遼史地理志統和二十五年。設城實以漢戶。號曰中京。

府曰大定。金史大定三年。土河注溢。水入京城。轉運使高德基命開長樂門。疏分使入御溝。以殺其勢。皆此城也。

遮蓋山

遮蓋山在赤峯縣翁牛特右旗南三十餘里。亦名阿圭山。入山十餘里。有洞。寬不及二丈。高一丈有餘。土人稱爲大碾子洞。中有石佛像及阿難迦葉像。其兩厓石壁上。亦俱鑿成佛像。上舊有院曰靈峯。有金皇統三年劉子初撰靈峯院千佛洞碑。及明萬曆四十五年重修靈峯院碑。

慶州故城

慶州故城在林西縣巴林旗西北一百三十里喀喇木倫河旁。蒙古名插漢城。周五里餘。喀喇木倫卽黑河。有黑山在其東北三十里許。遼史地理志慶州元寧軍。本太保山黑河之地。岩如險峻。穆宗建城。號黑河州。每歲來幸。後以地苦寒。統和八年州廢。聖宗秋畋。愛其奇秀。建號慶州。有黑山赤山太保

山老翁嶺饅頭山興國湖錫鑠黑河。統元德、孝安、富義三縣。

清圍場

圍場清帝狩獵之所也。今地屬圍場縣。縣卽以此而名。周一千三百餘里。東西三百餘里。南北二百餘里。東至喀喇沁旗界。西至察哈爾旗界。南至承德界。北至巴林及克什克騰界。東南至喀喇沁旗界。西南至察哈爾鑲白旗界。東北至翁牛特旗界。西北至察哈爾正藍旗界。昔時圍場規則四面樹柵。限別內外。按八旗以一營房統五卡倫。各有分地。以司稽察。圍場凡六十有七。計東界圍場十。西界圍場八。南界圍場五。北界圍場三。中界圍場九。東南界圍場十五。西南界圍場四。東北界圍場八。西北界圍場五。東界圍場內。諤爾根郭勒西之達顏德爾吉圍場北。有碑一。鐫清高宗御製古長城說。南界圍場內。正藍旗汗特穆爾卡倫北之塔里雅圖圍場厓口附近。有碑一。鐫御製入厓口詩。蓋自此西折而南。則石片子營房。卽崖口也。又鑲黃旗卜克卡倫

北之卜克園場。有碑一。鐫御製於木蘭作詩九首。又布都爾北之永安泮園場。有碑一。鐫御製永安泮殪虎詩。旁又鐫御製永安泮園場詩。備四體書。又永安泮東之僧機圖園場。南少西。有古松。同根異幹。高百尺。千年前物也。高宗行園過此。名曰夷齊松。作歌賦咏之。東南界園場內。巴顏喀喇西南之永安葬喀園場。有碑一。鐫御製文。東北界園場內。巴爾圖西南之岳樂園場。有碑一。鐫御製虎神鎗記。園場境地既廣。荒草叢生。林木鬱茂。野獸潛匿。人跡斷絕。其林木近雖加以斫伐。然其存者。尙數千萬株。大者直徑七八尺。高二三十丈。固數百年帝王勢力所培養。乃關外唯一之大森林也。



中華名勝古蹟續編目錄

第二十五編 察哈爾

一 興和……………一一六

蓮臺山 托几山 蘇達泉 多倫滌 彙宗寺碑 善因寺碑 岐王山 駸羊山

興安山 柳泉

中華名勝古蹟 第二十五編 目錄

中華名勝古蹟續編

第二十五編 察哈爾

一 興和

蓮台山

蓮台山在沽源縣西。山巒聳峙。遠望如蓮。林木蒼翳。風物幽秀。山南一岩曰盤巖。峭壁環之。迤北一洞。豁舒顯露。入內有小穴三。左右大而中小。土人云深八九里。入中洞者。曲折可通左右洞。入左右洞。亦曲折可通中洞。

托儿山

托儿山在多倫縣東。形如牛首。下一小潭。一巖垂俯。遠處眺望。彷彿牛飲於池也。山北有土城遺跡。不知築於何代。

蘇達泉

蘇達泉在多倫縣北虎達布爾山下。源出山半。下流瀦爲泉。愈下愈清。澄澈見底。惟長夏久旱則枯竭。

多倫灤

多倫灤在多倫縣。土人名多倫諾羅。清康熙三十年。喀爾喀爲噶爾丹所破。七旗皆抵寨來降。聖祖親臨寨外鎮撫之。駐蹕是地。各蒙古部長畢至。喀爾喀土謝圖汗澤卜布丹巴胡土克圖等。率台吉諾顏等朝見。令與四十九旗同列賜宴。授封爵有差。各蒙古諸藩共請於是地建寺。

彙宗寺碑

彙宗寺在多倫灤上。卽蒙古諸藩所請建者也。內有碑。刊御製文曰。一我國家承天順人。統一寰宇。薄海內外。悉賓悉臣。自太祖太宗握樞秉軸。駕馭風雲。蒙古都部相繼效順。暨於朕躬。克受厥成。前所未格。罔不思服。惟喀爾喀分部最多。而又強盛。朕綏德輯威。薰陶漸革。二十餘載。七家之衆。旣震且豫。

咸來受吏。乃除其頑梗。扶其良弱。錫之封爵。畀以土疆。朕親北巡。以鎮撫之。於康熙庚午之秋。大宴賚於多倫諾羅。四十八家。名王君長。世官貴族。靡不畢集。拜觴起舞。稽首踴躍。蓋至是而要荒混同。中外一家矣。酺賜既畢。合辭請曰。斯地川源平衍。水泉清溢。去天閑芻牧之場甚近。而諸部在瀚海龍堆之東西北者。道里至此。亦適相中。而今日之筵賞敷錫。合萬國以事一人。又從古所無也。願建寺以彰盛典。朕爲之立廟一區。令各部落居一僧以住持。朕或間歲一巡。諸部長於此會同述職焉。至於今又二十餘年矣。殿宇廊廡。鐘臺鼓閣。日就新整。而居民鱗比。屋廬望接。儼然一大都會也。先是寺未有額。茲特允寺僧之請。賜名曰彙宗。蓋四十八家家各一僧。佛法無二統之一宗。而會其有極。歸其有極。諸蒙古恰守侯度。奔走來同。猶江漢朝宗於海。其亦有宗之義也。夫是爲之記。以垂永久云。

善因寺碑

彙宗寺西南里許有善因寺。清雍正時建。有碑刊世宗御製文曰：「洪惟我皇考聖祖仁皇帝恩被九有。威加八紘。囊歲厄魯特嚙爾丹。跳梁朔漠。擾亂喀爾喀諸部。喀爾喀七旗數十萬衆。懷德慕義。稽首內附。皇考躬率六軍。遠行天討。駐蹕多倫諾爾之三地。受喀爾喀諸部君長朝謁。錫之封爵。爲我屏垣。旣剪凶渠。蕩定朔漠。撫安藩服。允從諸部所請。爰於斯地。勅建彙宗寺。俾大喇嘛章嘉胡圖克圖居之。章嘉胡圖克圖道行高超。證最上果。博通經品。克臻其奧。有大名於西域諸部蒙古。咸所尊仰。今其後身。秉質靈異。符驗顯然。且其教法流行。徒衆日廣。朕特行遣官發帑金十萬兩。於彙宗寺之西南里許。復建寺宇。賜額曰善因。俾章嘉胡圖克圖畢爾汗主持茲寺。集會喇嘛。講習經典。廣古妙法。蒙古汗王貝勒貝子公台吉等。俱同爲檀越主人。前身後身。敬信無二。自必率其部衆。聽從誨導。胥登善域。稽古聖王之治天下。因其教不易其俗。使人易知易從。此朕續承先志。護持黃教之意也。況此地爲

我皇考駐蹕之地。靈蹟斯存。惟茲兩寺當與漢野山川並垂無極。諸部蒙古台吉屬下。永遠崇奉。歡喜信受。薰蒸道化。以享我國家億萬年太平之福。朕深有望焉。」

岐王山

岐王山在豐鎮縣京綏鐵道豐鎮站南十餘里。一名奚望山。唐李克用嘗屯兵於此。上有鬥雞臺、岐王墓等古蹟。

駿羊山

駿羊山在豐鎮縣西南。三峯矗起。左巒最高。峻峭難上。山下有洞窈然。迤北又有一小洞。不可入遊。全山樹木扶疏。風景頗佳。

興安山

興安山在陶林縣西南。岡巒一起一伏。連互不斷。蜿蜒迂折。形勢壯秀。山中有巖曰漢兒巖。深邃高峻。境頗幽曠。惟不知命名之意。

柳泉

柳泉在商都縣北。蒙古名布克爾蘇台。平地涌出。泓然一碧。水味寒冽。清可鑑髮。

中華名勝古蹟續編目錄

第二十六編 綏遠

一 綏遠

蟠羊山 溫泉 白道 趙武靈王長城 武泉故城 凱旋橋 無量寺 崇福寺
延壽寺 五塔寺 博什克招 萬卷華嚴經塔 阿計頭殿 龍王廟泉 君子
津 東受降城 中受降城 西受降城 漢受降城

中華名勝古蹟 第二十六編 目錄

中華名勝古蹟續編

第二十六編 綏遠

一 綏遠

蟠羊山

蟠羊山在歸綏縣綏遠城東北六十五里。蒙古名衣馬圖。魏書太祖紀。天賜四年北巡。自參合陂東過蟠羊山。卽此。綏遠城在歸化城東北五里。周圍二千丈。高二丈四尺。與歸化城相望。清乾隆四年建。移右衛建威將軍駐其地。

溫泉

溫泉在歸綏歸化城外有二。一在城東北烏素圖村龍王廟左。一在城南上堡外。皆蒸氣升騰。噴波溫暖。沐浴其中。可除疴癢。

白道

白道在歸化城北。魏書太宗紀。泰常四年。西巡雲中。踰白道。北獵野馬於傳孤山。水經注。芒干水西南逕白道南。谷口有長城。背山面澤。謂之白道嶺。沿路惟土穴出泉。挹之不窮。隋書高祖紀。開皇三年。衛王爽破突厥於白道。寰宇記。白道川當原陽鎮北。欲至山上。當路有千餘步。地土白如石灰色。遙去百里。卽見之。卽陰山路也。

趙武靈王長城

歸化城北白道嶺上有古長城。垣若頽基。東西縣互。卽史記匈奴傳所謂趙武靈王築長城。自代並陰山下者是也。世以是爲趙武靈王長城遺跡。故仍呼曰趙武靈王長城。

武泉故城

或泉故城在歸綏東北。漢置。屬定襄郡。後漢末省。又縣東有陶陵故城。亦漢置。屬雲中郡。爲中部都尉治。後漢省。

凱旋橋

凱旋橋在歸化城北。大黑河支流之上。以石築成。乃清康熙時高宗征額魯特回所建。故名。

無量寺

無量寺在歸綏城內。大招街。蒙古語曰依克招。依克者大也。招者寺也。故土人亦呼曰大招。而街卽以寺名。屋宇極爲壯大。中爲大雄殿。內多小販。住於其中之喇嘛。可數百人。曩時多至數千人。較之今日。已盛極而衰矣。寺前有玉泉井。清冽可飲。汲者甚多。寺門上有九邊第一泉額。

崇福寺

崇福寺在歸綏城內。小招街。亦稱小招。清康熙時建。殿宇巍峨。極爲宏麗。有碑鐫聖祖御製文。具漢滿蒙番書。文曰。「朕惟歸化城爲古豐州地。山環水互。夙稱勝境。城南舊有佛刹。喇嘛拖音葺而新之。奏請寺額。因賜崇福寺。丙

子冬。朕以征厄魯特噶丹。師次歸化城。於寺前駐蹕。見其殿宇宏麗。法相莊嚴。命懸設寶幡。並以朕所御甲冑弓矢置寺中。夫朕之親有事於塞外。非無故也。厄魯特喀爾喀交惡相攻。朕憫念生靈塗炭。遣使諭解。而噶爾丹追擊喀爾喀。竟入略我烏珠穆秦。爰命和碩裕親王聲討。大敗於烏蘭布通。時噶爾丹盟誓佛前。永不入犯。乃班師而還。後噶爾丹蔑棄盟誓。復掠納木查爾拖音於克魯倫河之地。丙子。朕親總六師。由中路進剿。至克魯倫河。賊衆望見睿容宵遁。適朕所期會西路官兵。遇於昭木多。大敗之。俘斬無算。丹木巴哈什哈等。率衆來歸。噶爾丹跳身走。是冬。朕駐節鄂爾多斯。剿撫並用。厄魯特人衆。繹絡歸命。而噶爾丹仍未向順。丁丑。率師狼居胥山麓。官兵分道並進。噶爾丹計窮自斃。子女就獲。餘黨悉平。方今中外恬熙。邊境生民。咸得晏然安堵。喇嘛拖音請建碑。示永久。因書此勒石。牌後之覽者。知朕不憚寒暑之臨絕塞。爲民除殘之意。時康熙四十二年歲次癸未。

延壽寺

延壽寺在崇福寺西數百步。清康熙三十五年。錫拉圖呼圖克圖奏請重修。故一名錫拉圖招。光緒十三年失慎被燬。重又建造。殿宇宏壯。一時無匹。門額有陰山古剎四字。寺東南里許。又有卓爾齊招。乃康熙時達爾班卓爾齊所獨造也。

五塔寺

五塔寺在歸綏市街正東。蒙古語曰塔布斯普爾罕招。塔布者五也。斯普爾罕者塔也。故一名塔寺。寺前有五塔。煉磚所築。上琢佛像。外貼金葉。妙相莊嚴。浮屠兀聳。洵邊塞之異觀。歸綏之靈蹟也。

博什克招

博什克招在歸綏市西塔石河之右岸。相傳清聖祖嘗參拜此寺。呼圖克圖傲慢無禮。一侍從怒而殺之。蒙人大譁。聖祖宵遯。至張家口。沙必納罕等擒

侍從磔之以洩憤。今其俗奉祀有白將軍者。言卽被磔之人也。

萬卷華嚴經塔

萬卷華嚴經塔。卽大明寺塔也。在歸綏城東三十里。一名白塔。高二十丈。七級。上干雲霄。形勢奇偉。刻有華嚴經及金世宗時閱經人姓名。乃六百年來巨大之建築物也。

阿計頭殿

阿計頭殿在白道嶺北阜上。棟宇久圯。惟殿基猶在其外圍以城。有門四。世謂之阿計頭宮城。北魏時建。

龍王廟泉

龍王廟泉在薩拉齊縣包頭鎮。泉出自山坡龍王廟。故名。水瀦於池。清澄甘冽。爲民飲料。池側有孔。水從下注。堤上植柳。柔枝袅娜。宛然有江南風景。

君子津

君子津在托克托城西南黃河東岸。水經河水於槓陵桐過二縣間。濟有君子之名。注。昔漢桓帝十三年西幸榆中。東行代地。洛陽大賈贛金貸。隨帝後行。夜迷失道。往投津長田子封。送之渡河。賈人死。津長埋之。其子尋求父喪。發冢舉尸。資貸一無所損。其子悉以金與之。津長不受。後聞於帝。帝曰。君子也。卽以其津爲君子濟。魏書。昭成帝建國二十五年。南巡至君子津。世祖始光四年。詔執金吾桓貸。造橋於君子津。皆卽此。

東受降城

東受降城。今托克托縣地。在黃河東岸。唐中宗景龍二年。張仁愿築。元和志。東受降城。本漢雲中郡地。在榆牀縣東北八里。今屬振武節度。東北至單于都護府一百二十里。東南至朔州四百里。西至中受降城三百里。北至磧口八百里。

中受降城

中受降城今五原縣地。在烏喇特旗西。黃河北岸。亦張仁愿築。元和志。中受降城。本秦九原郡地。漢更名五原。開元十年於此置安北大都護府。後又移徙。東至東受降城三百里。西北至天德軍二百里。南至麟州四百里。北至磧口三百里。


西受降城

西受降城在鄂爾多斯右翼後旗西北。黃河北岸。元和志。西受降城在豐州西北八十里。蓋漢朔方郡臨河縣故理處。開元初。爲河水所壞。至開元十年。總管張說於故城東。別置新城。其後城西南隅。又爲河水所壞。正東微南至天德軍一百八十里。東南渡河至豐州八十里。西南至定遠城七百里。北至磧口三百里。先是朔方軍北與突厥以河爲界。河北岸有拂雲堆祠。突厥將入寇。必詣祠祭酬。因牧馬料兵。而後渡河。張仁愿爲總管時。突厥默啜盡衆西擊突騎施波葛仁。愿請乘虛奪取漠南之地。於河北築三受降城。首尾相

應以絕其南寇之路。中宗從之。六旬而三城俱就。以拂雲祠爲中城。與東西兩城相去各四百餘里。北拓地三百餘里。於牛山朝那山之北。置烽堠一千八百所。自是突厥不得度山放牧。朔方無復寇掠。唐呂溫有三受降城碑銘曰：「韓侯受命。志在朔易。北方之強。制以全策。互漢橫塞。揭茲雄壁。如三門龍躍。在大澤。並分襟帶。各閉風雷。俯視陰山。仰看昭回。一夫登陴。萬里洞開。日晏秋盡。纖塵不來。」

漢受降城

漢受降城在烏喇特旗北。卽漢九原北塞外。漢書武帝紀。太初元年。遣因杆將軍公孫敖築塞外受降城。匈奴傳。呼韓邪單于自請留居光祿塞下。有急保漢受降城。卽此。後魏太武帝太平眞君九年。北討至受降城。積糧城內。留守而還。蓋亦漢城也。



中華名勝古蹟續編目錄

第二十七編 川邊

一 川邊

溫泉 瀘定橋 臥龍石 岡里木山 疆拉尼嶺 都克山 卡朔山 札喀爾山
戎空寺 窟窿山 沙彌山 甯靜山碑 乍丫喇嘛寺 瓦合山 別琿山 阿
木爾山 丹達廟 喇嘛寺 曲齒喇嘛寺

一一六

中華名勝古蹟 第二十七編 目錄

中華名勝古蹟續編

第二十七編 川邊

一 川邊

溫泉

溫泉在康定北二道橋。分二池。一池水色清。一池水黑色。炎液融融。四時不竭。浴之可除疾痛。

瀘定橋

瀘定橋在瀘定大渡河上。其地舊無橋梁。河水迅激。不可施舟楫。行者從三渡口。援索懸渡。至爲危險。清康熙四十年。撫臣熊奏言。距化林營八十里。地名安樂。水忽平。可建橋以通行旅。遂造鐵鎖橋。東西長三十一丈一尺。廣七尺。施索九條。覆板於上。欄柱皆鎔鐵爲之。詔賜名瀘定。有御製碑記。後年久。

鐵鑪迭加修葺。今鐵索已由有九條而增至三十餘條。穩便可度。行人無意外之虞焉。

臥龍石

臥龍石在雅江臥龍石地方。地卽以石名也。石高十餘尺。突兀蒼翠。勢頗雄秀。相傳蜀漢諸葛亮南征時。屯宿於此。故名。

岡里木山

岡里木山在理化西俄洛附近。巖厓聳峙。形勢峻巍。山頂平坦。可眺望。林木青葱。遠見雪山皚皚。如堆羣玉。其下則碉塔高矗。宛似巨大之浮圖。亦一異觀也。

疆拉尼嶺

疆拉尼嶺在瞻化縣東北。峯嶂矗起。不通軌轍。迤北一曲徑。廣僅尺許。紆屈可通。其西則林木暢茂。蔚然深秀。行旅於此。則遊興爲之一振。

都克山

都克山在巴安縣北。峻峯重嶂。如不可上。其東有羊腸幽徑。盤旋可登。西有一岩。下有一洞。境地窈深。外以羣樹蔽之。

卡朔山

卡朔山在卡朔塘巴郎河附近。峯巒秀拔。巖岫深幽。森林葱蘢。一望蔚然。多松柏之屬。青翠欲滴。景物絕佳。

札喀爾山

札喀爾山在義敦縣二郎灣東。巖嶂峭拔。巖然兀立。厓壁如屏而立。山土現青黃色。古松圍繞其間。濤聲密陰。頗足娛一時之耳目。

戎空寺

戎空寺在昌都縣治。亦名江巴林寺。殿宇崇宏。殊爲華麗。喇嘛居之。

窟窿山

窟窿山在包墩地方。高三十里。巖嶂聳拔。望之巍然。綿互數十里。山麓有石洞。奇石紛陳。而前後左右。又多小洞。山名窟窿者。以此石洞附近。又有石門。屹立其間。

沙彌山

沙彌山在恩達縣松羅橋附近。巒峯秀拔。上多柏木。亭亭聳立。柯葉青蒼。其老者蓋已歷年數百矣。

寧靜山碑

寧靜山碑在寧靜縣寧靜山上。乃川藏之分界碑也。鐫曰。西藏雲南巴塘分界八字。蓋舊時自此以東。爲四川境。自此以西。爲西藏境。及清末趙爾豐官邊務大臣。始以江達爲界。卽今太昭縣是也。

乍丫喇嘛寺

乍丫喇嘛寺在察雅縣治。坐西北。向東南。極爲壯麗。土城高可百丈。有呼圖

克圖管理之。

瓦合山

瓦合山在恩達縣瓦合寨。五峯巍峨。繇互數十里。土石皆赤色。上有望竿。以爲大雪封山時之標記。又有廟曰翊化山神廟。其神卽清光緒時之某總兵。爲雪所壓斃者也。

別琫山

別琫山距洛隆宗六十里。又名碧貝山。亦曰貢喇山。高二十里。岡巒蜿蜒。曲徑盤旋。懸崖峭壁。形勢雄壯。

阿木爾山

阿木爾山在嘉黎縣阿蘭多。峯岫雄奇。林木繁茂。陰翳森寒。若無炎暑。瀑布懸崖而下。望如匹練。山鳴谷應。跳玉濺珠。景物絕佳。

丹達廟

丹達廟在嘉黎縣丹達山下。相傳清時雲南參軍某陷雪死。積久而屍直立不僵。土人異而祀之於此。丹達山崇宏高聳。終年雪積如垣墉。壁立萬仞。行者股栗。其東有曰閻王嶺者。尤爲險惡。

喇嘛寺

喇嘛寺在碩督縣治。寺以土石爲之。崇大雄壯。內供佛像。喇嘛僧禮拜於中。

曲齒喇嘛寺

曲齒喇嘛寺在碩督縣曲齒地方。殿宇最爲宏大。可容萬人。有呼圖克圖住持管理之。寺之四圍多峻山邃谷。形勢險固。

中華名勝古蹟續編目錄

第二十八編 外蒙古

汗山 拖諾山 菊海

中華名勝古蹟 第二十八編 目錄

中華名勝古蹟續編

第二十八編 外蒙古

汗山

汗山在庫倫南土喇河南岸。肯特山脈之南支也。本名愁石。一名汗阿林。崇山峻嶺。林木葱蘢。遠望青蒼。風物絕佳。元太祖嘗避兵於此。山之東有水。名坤河。北流入土喇河。其東南三十里許。地名昭莫多。今日東庫倫。清康熙三十五年五月戊辰。聖祖親征噶爾丹。西路大邀擊之於此。御筆勒銘曰。「天心洪佑。翦逆擢兇。困獸西竄。膏我軍鋒。一鼓而殲。漠庭遂空。摩厓刻石。丕振武功。」

拖諾山

拖諾山在車臣汗部克魯倫河（即臚胸河又名飲馬河）北岸。清康熙三

十五年五月丁卯。聖祖征噶爾丹。駐蹕於此。御筆勒銘曰「瀚海蕩蕩。臚胸
泱泱。親御六師。我武維揚。震雷霆威。警日月光。翦厥凶醜。安定遐荒。」

菊海

菊海在唐努烏梁海東境。一名庫蘇古爾泊。廣六十里。長一百六十里。蒙古
第一大澱也。烏魯克穆河源出此。海之四面羣山圍繞。宛如畫屏。嵐翠波光。
亦塞上之足娛目者。

中華名勝古蹟續編目錄

第二十九編 青海

車我真山 阿勒坦噶達素齊老峰 破邏真谷 青海 查靈海 鄂靈海 大莫門城

中華名勝古蹟
第二十九編
目錄

中華名勝古蹟續編

第二十九編 青海

車我真山

車我真山在西甯邊外西北。隋書煬帝紀。大業五年。帝至西平。吐谷渾率衆保袁州。帝分命元壽南屯金山。段文振北屯雪山。楊義臣東屯琵琶峽。張壽西屯泥嶺。四面圍之。其主伏允潛遁。遣其名王詐稱伏允。保車我真山。卽此。阿勒坦噶達素齊老峯

阿勒坦噶達素齊老峯在青海西境巴顏哈喇山。黃河之水源於此。志云。康熙間奉命尋訪河源。得阿勒坦郭勒於星宿海之西三百里。又其西有巨石高數丈。亭亭獨立。名阿勒坦噶達素齊老。蒙古語噶達素北極星也。齊老石也。唯此一石峯。其厓壁皆土。作黃赤色。更無草木。壁上爲天池。池中流泉噴

涌。釀爲百道。皆作金色。入阿勒坦郭勒。實黃河真源也。

破邏真谷

破邏真谷在西寧邊外西南。唐貞觀九年討吐谷渾。侯君集與任城王道宗引兵行無人之境。二千餘里。經破邏真谷。追及伏允於烏海。大破之。卽此。

青海

青海在青海東境。距西寧二百五十里。一名西海。又名卑禾羗海。古名鮮水。蒙古曰庫庫淖爾。境內第一大湖也。故以名地。海在北魏時。周千餘里。唐時可八百里。明代止七百餘里。今僅有五百餘里。乃漸涸矣。水作碧綠色。味鹹。冬不枯。夏不溢。海中產魚。圓而無鱗。背負黑點。中有島。東曰魁孫拖羅海。西曰察罕哈達。兩兩對峙。形如牛角。島上有寺。喇嘛居焉。喇嘛終年居寺。鮮度海。天寒水凍。然後履行冰上。取一年之糧。爲全歲之食。蓋平時水弱。難浮舟楫。不得往來也。北魏時吐谷渾每冬冰合後。以良牧馬置海中山上。至來春

收之。馬皆有孕。所生之駒。號爲龍種。多駿異。嘗得波斯草馬。放入海。因生驄駒。能日行千里。世傳青海驄者是也。隋煬帝亦嘗置馬於中。以求龍鍾。無效而止。清雍正二年。征阿刺蒲坦。溫布等。追至西海北岸。伊克哈爾吉河。其時人馬渴甚。求水不得。忽有泉從營前涌出。成溪。士馬就飲。得不困乏。衆歡呼奮勇。遂獲賊首。督臣以爲青海效靈。奏聞。詔封青海之神。立碑致祭焉。

查靈海

查靈海在鄂敦他拉之東。廣二百里。東西長。南北狹。黃河互其中而流。湖色白而形長。

鄂靈海

鄂靈海在查靈海東五十餘里。周二百里。其形自東北趨西南。東北狹。西南廣。黃河經其中。自東北流出。湖水青而形長。踞山遙望。查靈鄂靈。一青一白。相映成異觀。元史所謂羣海奔湊。匯二巨澤。名鄂楞諾爾。卽此二海也。

大莫門城

大莫門城在西寧西南河曲之地。唐吐蕃所築。通鑑唐開元十六年。河西節度使蕭嵩隴右節度使張忠亮大破吐蕃於大波谷。忠亮追之。拔其大莫門城。焚其駱駝橋而還。胡三省注。大莫門城在九曲。唐書吐蕃傳。天寶十二載。哥舒翰破洪濟大莫門諸城。收九曲故地。是也。

中華名勝古蹟續編目錄

第三十編 西藏

騰格里海 牙母魯克池 巴漢招廟 永泰寺 大詔寺 僧格喀巴布山 狼千
喀巴布山 馬布加喀巴布山 達木楚克喀巴布山

中華名勝古蹟續編

第三十編 西藏

騰格里海

騰格里海在前藏拉薩西北二百二十餘里。藏人曰納木錯。廣六百餘里。周千餘里。出海平面萬五千一百餘里。形橢圓。東西甚長。南北稍狹。水色青蒼。蒙古呼天爲騰格里。以其色似故名。味鹹苦。不可供飲。每屆寒時。則堅冰結實。上可行車。海面如鏡。四圍雪峯映之。成一奇觀。土人多遊覽其中。

牙母魯克池

牙母魯克池在前藏雅魯藏布江南三十里。中有三山。一名米納巴。一名鴉博山。一名桑里山。溪流甚多。時白時黑。或成五色。中多魚。池形如玦。周五百里。其西缺處有一小池。曰多木湖。淵深不可測。唐書所謂悶懼盧川贊普夏

衙所在也。

巴漢招廟

巴漢招廟在拉薩北。相傳唐時吐蕃贊普所娶巴勒布國女子所建。巴漢譯言小也。清乾隆二十五年賜廟額曰耆闍真境。

永泰寺

永泰寺在拉薩東南八十里。一名噶爾丹廟。相傳宗喀巴所建。內有宗喀巴之塔及所遺坐床。喇嘛居之。永泰寺額乃清雍正十一年所賜也。

大詔寺

大詔寺在拉薩城。番名老木郎。唐建。全寺爲銅質所築成。外更鍍之以金。殿宇樓臺燦爛莊嚴。蓉成奇觀。中有覺釋迦牟尼唐文成公主並吐蕃贊普與巴布國王女像。又有佛像數萬。寶相圓妙。世所謂佛國者。其卽此歟。

僧格喀巴布山

僧格喀巴布山在阿耨達山北。爲阿耨達山相近四大山之一。土人以其形似獅子。故名。拉楚河源出此山之南。其西北斜趨接於和闐之尼蟠依山及葱嶺諸山。爲西域諸山之祖。

狼千喀巴布山

狼千喀巴布山在阿耨達山南。爲阿耨達山相近四大山之一。土人以其形似象。故名。狼楚河發源於此。

馬布加喀巴布山

馬布加喀巴布山在達克拉城西北一百四十里。山脈自悶那克尼兒山來。爲阿耨達山相近四大山之一。土人以其形似孔雀。故名。麻楚河發源此山之南。自此西向。互狼楚河之南二千餘里。盡於拉楚狼楚兩河交會之所。

達木楚克喀巴布山

達木楚克喀巴布山在悶那克尼兒山東南。爲阿耨達山相近四大山之一。

土人以其形似馬故名。雅魯藏布江發源此山之東。爲藏之西南界。

中華民國十三年一月十五月初版

中華全國名勝古蹟大觀續編

精裝布面壹冊	定價大洋五元
並裝紙面六冊	定價大洋四元

(外埠酌加郵費滙費)



編輯者 大陸圖書公司

發行者 大陸圖書公司

印刷者 大陸圖書公司

總發行所 上海
路四馬中
大陸圖書公司

上海图书馆藏书



A541 212 0018 9756B

